



Rollup Banner Hot Price! Best price in PNG!!

OFFER EXTENDED UNTIL 31st AUGUST

K440 inc. GST SINGLE SIDED

K825 inc. GST DOUBLE SIDED

Only at... **THEODIST LTD** THE STATIONERY SUPERMARKET

- PREMIUM STYLE 85cm WIDE BASE
- FULL COLOUR SEMI-GLOSS PRINT
- DESIGN SERVICE AVAILABLE

Waigani Drive, POM Ph:313 9800 sales@theodist.com.pg

Markham Road, LAE Ph:472 5488 saleslae@theodist.com.pg

Nupela TB marasin bilong ol pikinini - P7

Manmeri Westen ken kotim BHP Billiton

OL manmeri bilong Westen Provis i ken kotim pastaim opereta bilong Ok Tedi Main long bikpela bagarap em i bin mekim long bus, graun na wara long Westen Provis, Praim Minista Peter O'Neill i tok.

Mista O'Neill i tok Palamen i rausim pinis wanpela lo we i bin stopim PNG Gavman, Westen Provisal Gavman, ol manmeri bilong Westen Provis na ol papagraun long kotim BHP Billiton.

Long yia 2013 Palamen i bin pasim nupela lo ol i kolim 'Ok Tedi Tenth Supplemental Agreement Act 2013'.

Dispela nupela lo i givim pawa long ol manmeri na gavman long kotim dispela bikpela maining kampani bilong Australia, na askim em long baim bikpela kompensesen mani long OK Tedi maining operesen i bagarapim laip bilong ol manmeri husat i stap arere long Fly River.

Mista O'Neill i autim dispela toktok long Nesenel Palamen long Trinde dispela wik taim NCD Gavana Powes Parkop i askim sapos PNG Gavman i ken kotim BHP Billiton long em i bin bagarapim bus, graun na wara long Westen Provis.

Taim BHP Billiton i bin

ranim maining operesen long Ok Tedi, em i bin kapsaitim ol kemikel na marasin nogut bilong main i go daun long Fly River, na kilim dai ol pis na arapela samting long wara.

Dispela ol kemikel na marasin nogut i bin bagarapim bus, graun na wara long Westen Provis.

Memba bilong Not Fly, Boka Kondra, i bin tok ol kemikel nogut i bin bagarapim laip bilong ol manmeri husat i save stap arere long Fly River na sampela manmeri i bin kisim bikpela bagarap.

I go moa long pes 2

Bilas bilong Hiritano stret...

(L-R) Tambu bilong Pater Jacek, nem bilong em tu Jacek, Pater Jacek Tendej C.M, Beata, susa bilong Pater Jacek ol bilong kantri Poland i sanap kisim poto bihain long jubili misa selebresen. Poto: Fr. Lawrence Arockiaraj Stori i stap long pes 12...

CHECK-IN FAST! CHECK-IN ONLINE!

Book a Flight Manage Booking Check In

Return One Way Multi-City

From ... 30/05/2016

Adults 1 Children 0 Infants 0 Economy

Sort By Flexible Date Price Schedule

O'Neill: Bai no gat Hela bai-ileksen

BAI-Ileksen bilong makim nupela gavana bilong Hela Provins bai no inap kamap bikos taim i sot na tu ol polis i no redi, Praim Minista Peter O'Neill i tok.

Mista O'Neill i tokim Palamen olsem planti pait i kamap long Hela Provins na sekyuriti bilong ol wok manmeri bilong Iektoral Komisina na arapela manmeri long ples i no stap gut.

"Taim i sot na 2017 Nesenel Ilek-sen bai kamap klostu taim tasol. Ating dispela bai no inap larim yumi long kamapim wanpela bai-ileksen.

"Sekyuriti i no stap gut. Ripot mi kisim long Polis Komisina i soim olsem planti bikpela pait i kamap long Hela. Ating wanpela Memba bai kamap ekting gavana i go inap neks yia taim bikpela ileksen bai kamap long kantri,"Mista O'Neill i tok.

Em i tok gavman i luksave olsem Hela em i namba wan provins insait long kantri bikos ges bilong bikpela PNG LNG Projek i kam long Hela.

"Gavman i luksave long bikpela ges projek i kamap long kantri bilong yumi. Ges i kam long Hela na Hela em i nupela provins.

"Hela i nidim gutpela lidasip. Gavman bai helpim Hela Provinsal Asembli long kamapim gen wanpela bung long makim nupela ekting gavana bilong provins.

"Gavman helpim ol Hela pipel long makim ekting gavana, husat bai lukautim provins i go inap neks yia ileksen,"Mista O'Neill i tok.

Hela nau i gat tupela gavana bihain long Provinsal Asembli i bin kamapim tupela bung long Julai 5 long makim ekting gavana.

Long 10-klok moning long dispela de, sampela memba bilong provinsal Haus ov Asembli i makim

Memba bilong Koroba-Lake Kopiago, Philip Undialu, i kamap ekting gavana.

Long 2-klok apinun arapela memba bilong provinsal asembli i makim Memba bilong Komo-Margarima, Francis Potape, i kamap ekting gavana.

Ol ripot i kam long opis bilong Stet Solisita i tok namba wan bung long moning i bin lukim Asembli Klak, Watson Ebela, i kamap siaman bilong miting we i lukim ol memba i makim Mista Undialu i kamap ekting gavana.

Namba tu miting long apinun i

lukim deputi gavana Thomas Potape i kamap siaman bilong bung we i lukim Memba bilong Komo-Margarima i kamap ekting gavana.

Stet Solisita Daniel Rol Pagarea i tok em i luksave long Mista Potape olsem nupela ekting gavana.

Deputi Praim Minista na Minista bilong Inta-Gavman Rilesens, Leo Dion, i tok em i luksave long Mista Undialu olsem nupela ekting gavana.

Tupela memba wantaim i wok long strongim sait yet olsem tupela i gavana bilong Hela.

PNGCMP laikim intenesenel maining lo

James G. Kila i raitim

PNG SEMBA ov Mains na Petroleum i laikim kantri long bihainim ol intenesenel lo bilong maining we i go wantaim wol klas industri na i ken bringim moa investmen i kam insait long kantri.

Semba i tokaut long dispela long Tunde bihain long ripot i kamaut long midia olsem Dipatmen ov Mineral Polisi na Jiohazard Menesmen (DMPGM) i tokaut olsem Semba i no laik sapotim senis long kamap long nupela Maining Ekt bilong 1992 na no laikim gavman tok orait long en.

Insait long wanpela stetmen bilong PNGCMP, em i tokaut olsem semba wantaim ol industri memba bilong en i wok

long mekim planti ol tok tok i go kam wantaim DMPGM, ol i givim sampela ol ekspirien bilong ol we ol i bungim long ol arapela kantri long wol. Ol i laikim olsem i mas gat indipenden wok painimaut i kamap long dispela nupela senis long lo long lukim sapos dispela senis long lo bai no inap bringim hevi long industri na ikonomi long PNG.

PNGCMP i tokaut olsem dispela ol senis we gavman i laik kamapim long Maining Ekt bai lukim PNG i lusim planti bilien mani tru. Dispela senis bai bringim hevi long ol stekholda, na tu planti tausen wok bai bungim hevi na tu bai i gat hevi long sosel divelopmen olsem helt,

edukesen na trening na gro bilong ol smol na midium entaprais (SME) na tu ol lenona bisnis. Dispela senis long ekt o maining lo bai mekim ol investa i les long kam wokim bisnis long PNG.

PNGCMP i tok tu olsem ol projek we i redi long kirap olsem Frieda Riva na Wafi-Golpu bai bungim hevi stret taim senis i kamap long Maining Ekt.

Semba i tok olsem ol i bin traim long toktok moa wantaim Gavman, tasol DMPGM i no laik long lukluk na skelim pastaim ol dispela samting we bai kamap. Long dispela as tasol na semba wantaim ol maining industri lain i no sapotim nupela ekt o lo gavman i kamapim bikos em bai

bringim bikpela hevi stret long ol maining operesen nau i stap long kantri na bai givim hevi tu long ol wok bilong maining eksploresen long PNG.

CMP i bilip tu olsem dispela nupela Maining Ekt gavman i laik kamapim bai no inap soim PNG olsem gutpela ples long ol mineral eksploresen kampani long kam na mekim wok long hia.

Long wankain taim, Praim Minista, Peter O'Neill i tokaut long palamen long Tunde olsem dispela Maining Ekt we rivi nau i kamap long en bai orait long olgeta stekholda olsem ol papagraun, provinsal gavman na ol maining kampani.

Mani bilong LNG papagraun stap gut

FAINENS Minista James Marape i tok mani bilong ol papagraun bilong PNG LNG Projek i stap gut long tras akaun long Bank ov PNG.

Mista Marape i givim dispela toktok taim ol papagraun long Hides 4 PDL 7 eria long Hela Provins i laik pasim PNG LNG Projek.

Ol papagraun lida olsem Larry Andagali i tok ol i no kisim planti sevis na sampela ol mani we ol inap long kisim aninit long Ambrela Benefit Sering Agrimen (UBSA) ol i bin sainim

wantaim gavman na ExxonMobil long Kokopo long 2008.

Taim ExxonMobil i salim ges i go aut long PNG, ol kampani projek patna i wok long mekim mani tasol ol papagraun i no kisim ol royalti mani.

Gavana bilong Bank ov PNG, Loi Bakani, i bin tok olgeta mani bilong ol papagraun i stap gut long tras akaun insait long Sentral Benk.

Praim Minista Peter O'Neill tu i mekim wankain toktok taim ol papagraun i bin askim

royalti mani bilong ol long las yia.

Nau ol papagraun laikim royalti mani na sapos gavman i no givim, ol i laik pasim projek long Hides 4 na arapela projek eria insait long Hela.

Tasol Mista Marape, husat i Memba bilong Tari-Pori, i tokim ol papagraun olsem mani bilong ol i stap gut long Sentral Benk.

"Taim kot i painimaut long tru tru papagraun bilong ol projek eria, gavman bai rausim dispela mani na givim i go long ol.

Manmeri bilong Westen ken kotim BHP Biliton

I kam long pes 1...

Ol papagraun na manmeri long Westen Provins i bin laik long kisim BHP Biliton i go long kot tasol BHP i bin abrusim kot bikos Palamen i bin kamapim lo long larim BHP i abrusim kot.

Dispela lo i bin kamapim PNG Sustainable Development Program (PNGSDP). BHP i bin givim K2 bilien long PNGSDP i ken yusim long givim komyuniti sevis long Westen Provins.

"Sir Mekere Morauta i bin stap praime minista long dispela taim, na em i yusim Palamen long pasim wanpela lo long stopim PNG Gav-

man, Westen Provinsal Gavman, ol manmeri bilong Westen Provins na ol papagraun i kotim BHP Biliton,"Mista O'Neill i tok.

Mista O'Neill i tok long yia 2013 Palamen i rausim pinis dispela lo na nau ol papagraun o ol manmeri long Westen Provins i ken kotim BHP Biliton.

Em i tok gavman i putim pipel bilong Westen Provins i go pas na kirapim dispela nupela lo long yia 2013.

"Dispela lo i stap nau. Ol manmeri bilong yumi long Westen Provins i ken kotim BHP,"Mista O'Neill i tok.

Em i tok pastaim siaman bilong Ok Tedi, Profesa Ross Garnaut na Siaman bilong PNGSDP, Sir Mekere Morauta, i bin askim gavman long pasim Ok Tedi Main tasol gavman i no bin wanbel long dispela toktok bilong tupela man.

"Mipela i les long pasim Ok Tedi bikos PNG i nidim mani bilong Ok Tedi long ranim kantri. Long dispela as, gavman i tekova long Ok Tedi main.

"Sir Mekere i lus long kot long Amerika, na tupela taim long Singapore. Gavman i winim kot na OK Tedi Main nau em bilong gavman na pipel bilong dispela kantri.

"Westen Provinsal Gavman i gat bikpela sea insait long kampani. Na mipela bai helpim ol manmeri bilong Westen long kotim BHP Biliton,"Mista O'Neill i tok.

Long dispela wik Tunde, Menesing Dairekta bilong Ok Tedi Mining Limited, Peter Graham, i tok Ok Tedi Main i mekim 12-pela ekspot sipmen bihain long main i bin op gen long Mas dispela yia.

Em i tok mani mak bilong dispela ekspot sipmen em i K623 milien.

Mista Graham i tok Ok Tedi Maining i ran gut nau na i lukluk long mekim moa ekspot na salim moa kopa long bringim moa mani i kam bek gen long kantri.



Praim Minista Peter O'Neill.

Kolta i kamap long Boluminski Haiwe

NU Ailan Gavana Sir Julius Chan i wanbel long gavman i tokaut long putim kolta long Boluminski Haiwe namel long Kavieng na Namatanai. Sir Julius i amamas long dispela tasol em i no wanbel long gavman i no bin mekim dispela

projek longtaim yet. "Mi amamas long dispela projek tasol mi no wanbel long Nesanel Gavman i no bin givim dispela projek longtaim yet. Mipela i bin wet 20 yia long kisim dispela kolta," Sir Julius i tok. Sir Julius i tok mani ol i

yusim long putim kolta long dispela haiwe, em i no mani bilong Nesanel Gavman. "Mi mas mekim klia. Dispela mani i kam long Lihir MoA fan. Em i no kam long Nesanel Gavman," Sir Julius i tok.

KCH sainim agrimen wantaim Hong Kong kampani

Kumul Consolidated Holdings (KCH) i sainim wanpela agrimen wantaim wanpela kampani bilong Hong Kong. Nem bilong dispela kampani em i Shin Kong Pacific Investment Limited (SKPIL) na em i save kirapim o bikpela propeti o haus. Dispela agrimen bai lukim KCH wantaim SKPIL i wokbung long kirapim wanpela 5-sta hotel long Pot Mosbi. Dispela nupela hotel bai gat 500 rum we ol bai brukim dispela ol rum i go long ol kain kain rum

olsem fanksen rum, konvensen eria, jim, spa, haus kai na ol liklik stua. Menesmen wok bilong dispela nupela hotel bai stap long han bilong wanpela biknem hotel opereta husat i gat ekspirens long ranim ol bikpela hotel long arapela ol kantri. SKPIL em i wanpela liklik kampani bilong Shin Kong Investment Co. Ltd. Dispela kampani i gat moa ekspirens long kirapim ol bikpela haus na bilding long Esia. SKPIL i gat bikpela ril estet bisnis long Taiwan na Japan, na nau ol i laik

kirapim nupela brens long PNG. Dispela nupela hotel long Pot Mosbi em i bihainim invesmen plen bilong ol long inves long Pot Mosbi, na long Tokyo na Osaka long Japan. Menesing Dairekta bilong KCH, Garry Hersey i tok; "Patnasip namel long KCH na SKPIL bai lukim planti gutpela developmen i kamap long Pot Mosbi." Mista Hersey i tok tupela KCH na SKPIL bai painim wanpela graun insait long Pot Mosbi long kirapim dispela hotel.



KCH menesing dairekta, Garry Hersey na Presiden bilong SKPIL, Ching-Cheng Tseng.

Morobe gavman wet yet long kisim PSIP

MOROBE Provinsal Gavman i wet yet long kisim sampela moa mani bilong Provinsal Sevis Impruvmen Program (PSIP) fanding bilong yia 2015.

Morobe Gavana Kelly Naru i tok ol manmeri bilong Morobe i wet yet long kisim moa long K30 milien long Nesanel Gavman. Dispela mani em i no mani bilong dispela yia, tasol em i mani bilong las yia, 2015. Mista Naru i tok gavman i no givim dispela

mani na provinsal gavman i hat long givim gut ol besik sevis long wan wan distrik insait long Morobe Provins. Mista Naru i autim dispela toktok taim em i laik givim bek ripot bilong Provinsal Sapot Grant na PSIP mani Morobe Provinsal Gavman i bin yusim long yia 2013, 2014 na 2015. Em i givim dispela ripot i go long Dipatmen ov Implementesen na Rurel Developmen long Pot Mosbi long las wik Fraide.

Mista Naru i tok em i kisim K9 milien long K45 milien em Nesanel Gavman i mas givim long Morobe. Em i tok Nesanel Gavman i no givim yet K36 milien PSIP mani bilong las yia (2015). Mista Naru i tok dispela K36 milien bai kam long baset bilong dispela yia. "Tasol mi no klia gut sapos gavman bai givim dispela mani hariap. Sampela ol projek bilong provins i no pinis yet na mipela i wetim dispela mani,"

Mista Naru i tok sapos gavman i givim dispela mani hariap Morobe Provinsal Gavman bai inap long pinisim sampela ol bikpela projek insait long provins. Mista Naru i no tokaut long wanem kain ol projek provinsal gavman bilong em i wok long kirapim. Tasol em i tok olgeta mani provinsal gavman i kisim long yia 2015 i pinis bikos long hevi bilong ikonomi kantri i bin bungim.

Namatanai distrik opim tupela nupela bris

Ahimsa Kibikibi i raitim

TUPELA nupela bris nau i op long pablik insait long Namatanai Distrik bilong Niu Ailan Provins long Fonde Ogas 4. Ol pipel long ol ples klostu long wara Marr na Dalmakas nau bai inap long wokabaut gut i go long wok, salim kaikai na go hariap long haus sik na skul. Ol pipel i bin save kisim taim klostu 20 yia nau bikos i no gat gutpela bris. Planti pipel i bin kamap long bikpela amamas long Fonde wik i go pinis. Planti man, meri na pikinini i kam long bung bilong opim ol biris na tok ol i amamas tru long dispela tupela nupela biris. Ol pikinini skul i kam singsing long hevi ol manmeri i save painim taim dispela tupela wara i save tait long taim bilong bikpela ren. Long kain taim olsem ol kar i no save inap katim wara na i save slip arere long Wara Pita na Dalmakas. Planti taim bipo, ol i save slip na kirap arere long rot taim wara i tait. Gavana Sir Julius Chan i



Bikpela lain manmeri i kamap lukluk long taim bilong opim tupela bris. Nupela Bris bai helpim sindaun bilong ol pipel. Foto: Ahimsa Kibikibi

tokim ol pipel bilong Namatanai long ol i mas lukautim gut bris bilong ol na save olsem kain samting olsem ol i mas lukautim gut na pikinini na tumbuna bilong ol tu i ken yusim long bihain taim. Sir Julius i tokim ol pipel long no ken larim ol giaman lain i paulim ol long ol kain tingting i

no stret na bai mekim ol i givim baksait long ol pikinini bilong ol, taim ol i pundaun long ol tok gris. Tupela biris, Niu Ailan Provinsal Gavman i spenim moa long K3 million long mekim wantaim helpim bilong Provinsal na Nesanel Dipatmen bilong Woks na Hornibrooks Ltd.

SMART SOLUTIONS FOR SMALL BUSINESS

"With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the Smart Business current account provided transaction records that were used to support my **BSP Smart Business Loan** application to help me expand my Business."

Helen Victor
Owner of Zoenani Gas Ltd
BSP Smart Business customer



WE ARE **BSP**

PNGDF gat bras ben namba wan taim

Paul Zuvani i raitim

BIHAIN long 60 yia long Papua Niugini Difens Fos i yusim tasol bek paip na dram ben em i gat bras ben.

Ol samting bilong bras ben i kam long Sendai Ikuei Gakuen Hai Skul long Siapan.

Dispela Hai Skul i givim ol samting i kam long tok tenkyu long Papua Niugini long PNG i helpim Siapan long hevi em i bungim bihain long wanpela bikipela graun guria na hia wara i bagarapim kantri bilong ol long 2011.

Sendai Ikuei Gakuen

Hai Skul, we i bin stat long 1905 i bin kisim bikipela bagarap na i bin kisim gutpela helpim long mani PNG i bin givim long ol.

Long tok tenkyu long Hai Skul Kenol Raymond Numa i makim maus bilong PNG Difens Fos Komanda Brigidia Jenerel Gilbert Toropo, i amamas na tok tenkyu long Gauken Hai Skul.

Numa i tok dispela ol musik samting bai redim PNG Difens Fos Ben long save gut na yusim dispela samting taim em i wet long kisim moa ol bras ben pilai samting long Gavman bilong Sia-

pan aninit long Grasruts na Kulturel Gren Projek.

Em I tok wantaim bek paip na dram ben na helpim gut ben bilong PNGDF long pilai taim ol bikipela bung olsem Esia Pasifik Ikonmik Koperesen (Apec) i kamap long PNG long 2018.

Long taim bilong givim dispela ol samting bilong pilai Siapan Embasada long PNG Morio Matsumoto i tok ol i givim dispela ol samting bilong pilai bihain long PNGDF I kamapim ol toktok namel long Gavman bilong Siapan long stat bilong 2016 long em i

laikim ol samting bilong pilai

Matsumoto i tok tu olsem moa ol samting bilong pilai bras ben em Gavman bilong Siapan bai bai givim sampela taim bihain long dispela yia.

Em i tok wantaim PNGDF Gakuen Hai Skul givim tu ol desk na sia long foapela skul long Nesenel Kapitel Distrik na Sentrel provins.

Dispela ol skul em Pot Mosbi Nesenel Hai Skul, Ward Strip Praimeri Skul, Jubilee Katolik Sekendar Skul na Sogeri Nesenel Hai Skul.

Sir Julius: Provinsal gavman baim skul fi pinis

OL sumatin bilong Nu Ailan Provins husat i stap long ol yunivesiti na ol koles i kisim fri eduekesen subsidi mani bilong ol, Gavana Sir Julius Chan i tok.

Sir Julius i tok dispela fri edukesen polisi bilong Nu Ailan i wok long karim gutpela kaikai tasol ai bilong sampela manmeri i pas na ol i no lukim gut wanem samting i kamap.

"Provinsal gavman i peim skul fi pinis long ol sumatin bilong Nu Ailan i skul long ol yunivesiti na kolis insait

long kantri," Sir Julius i tok.

Sir Julius i tok provinsal gavman i peim K2, 500 long wan sumatin long skul yia 2016.

"Mipela i bihainim polisi bilong fri edukesen na stat long yia 2008, provinsal gavman i bin sapotim ol sumatin na papamama wantaim fri edukesen polisi we provinsal gavman i save peim skul fi bilong ol sumatin," Sir Julius i tok.

Em i tok moa long K70 milien i go long sapotim fri edukesen

na dispela program em i wanpela gutpela program we provinsal gavman i les long stopim.

"Provinsal gavman i rausim hevi bilong ol papamama na planti ol famili long Nu Ailan i amamas long dispela helpim provinsal gavman i givim," Sir Julius i tok.

Sir Julius i tok dispela fri edukesen subsidi i save karamapim skul fi bilong ol pikinini husat i skul long ol yunivesiti na kolis we Nesenel Trening Kaunsil i tok orait long en.

ELC-PNG Karkar distrik yut askim long Solwara 1 projek ripot

MOA long 1000 memba bilong 6-pela seket long Evanjelikal Luteran Sios (ELC)-PNG Karkar distrik long Madang we i makim moa long 50,000 memba wantaim memba bilong ol arapela sios i askim Nautilus, kampani i mekim wok long Solwara 1 projek long tokaut long pablik long wok ripot bilong en.

Ol yangpela we i makim ol seket olsem Kulubob, Tagub, Bumsol, Bagiai, Samoa na Bagbag i mekim dispela singaut taim ol i bung long namba 6 Karkar distrik Yut Konferens long Kuluk, Bagbag Ailan long Madang

long 24 i go long 29 Julai long dispela yia.

Wantaim long Nautilus ol yangpela i askim tu opis bilong Maining Minista na Envairomen na Konsevesen Atoriti Minista long kamapim ples klia ripot bilong ol long dispela projek.

Ol i mekim dispela askim aninit long Seksen 51 long Mama Lo we i tok olgeta sitisen i gat rait long kisim save long kain toktok we wok bilong en i pas long laip bilong ol.

Long dispela as ol yangpela i askim long kisim ripot bilong:

- Envairomen pemit bilong 2009 wantaim ol toktok i

stap long em;

- Senis i kamap long Envairomen pemit we i go long Nautilus na ol arapela toktok;

- Insepsen Ripot bilong projek we Nautilus i kamapim na givim long Envairomen na Konsevesen Atoriti long 2007;

- Envairomen Menesmen Plen bilong projek;

- Osenograpik (oceanographic) ripot Cardno Lawson Treloar i kamapim long 2009 na givim long Envairomen na Konsevesen Atoriti na ol arapela moa kain ripot olsem.

NAQIA stretim haus bilong slip



Ol nupela haus long NAQIA tes leboratri. Poto: Gary Fagan.

Nesenel Egrikalsa Kwarant Inspeksen Atoriti (NAQIA) i save was long ol enimal na plent no gut bai no ken kam insait long kantri na bagarapim ol enimal na plent na ikonomi bilong yumi.

Wanpela bikipela hap bilong mekim dispela wok em i stap long Nesenel Enimal Helt na Kaikai Tes Leboratri

long Kila Kila long Pot Mosbi. Long dispela leboratri i gat ol saientis na ol teknisen bilong kaikai na enimal i stap na wok.

Wantaim nupela menesmen nau i stap long NAQIA, wanpela wok ol i mekim em long stretim ol haus bilong ol opisa husat i save stap insait long dispela Leboratri eria na wok.

Ol i stat long kirapim 9-pela nupela haus long Kila Kila na ol i klostu long pinis nau.

Propeti na Aset Menesea, Felix Pungu i tok ol haus bai redi long ol tenen long go insait nau.

Kontrakta, L & V Bilda i bin winim dispela kontrak long kirapim ol haus bilong ol wokman na wokmeri.

Abe strongim toktok bilong sapotim PNG

Paul Zuvani i raitim

SIAPAN Praim Minista Shinzo Abe i strongim toktok bilong sapotim PNG taim PNG i holim Esia Pasifik Ikonmik Koporesen (Apec) kibung long 2018.

Abe i tokaut long dispela taim em i bung wantaim Praim Minista Peter O'Neill long bung bilong G-7 kibung long Siapan namel long dispela yia.

Long dispela bung tupela lidaman i toktok long wok bung long wok developmen long maket (trade) na invesmen long ol samting olsem LNG projek, piseris indastri, sastenibel developmen na mani (aid) helpim Siapan i save givim aninit long ol program olsem Wol Fud Program (WFP).

Tupela i bin toktok long strongim sekyuriti trening program PNG long redim PNG long holim Apec kibung.

Long bung Abe i bin tok long helpim wantaim ol nupela samting bilong pilai musik bilong Papua Niugini Difens Fos ben.

Pastaim long dispela bung Siapan i bin helpim wantaim ol arapela samting long dispela yia olsem wokabaut bilong ODA nius grup long Morobe long Februari long ol projek Siapan i fanim olsem wok i kamap long ol rot, bris, pawa lain, kamapim Eben (Urban) Developmen Plen na Humen Risoses Developmen.



Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavisor bilong mipela long Fon: **325 2500 o Mobail namba: 7384 6688 o email i kam long: seovo@wantokniuspepa.com**

Niki Aina (han sut) i pilai taim wanwok bilong en i holim pepa bilong singsing long em i winim trampet.

Poto: Paul Zuvani

Life after Open Heart Surgery

If you had coronary artery bypass graft surgery, the life-threatening or severe blockages in your heart arteries have been corrected, but the work of improving your cardiovascular health is far from over. The blockages in your arteries were caused by an underlying, progressive disease process in which a fatty, waxy substance called plaque builds up on the artery walls and restricts blood flow.

This same disease process can: block the carotid arteries leading to the brain, causing stroke;

block blood flow to the legs, causing peripheral artery disease; or

block blood flow to the kidneys causing kidney (renal) artery disease.

Long-term recovery from coronary bypass surgery will involve managing the risk factors that are contributing to your cardiovascular disease. Some risk factors, such as family history, can't be changed, but others such as dietary and exercise habits can be. Medical professionals and support groups are available to help you make these and other lifestyle changes.

Read on for the steps you can take to improve your heart health after coronary artery bypass graft surgery.

Remember that that the disease process that caused blockages in your heart arteries was progressive, and so will be recovery.

You will want to follow the guidelines of the medical professionals on your coronary bypass surgery care team for returning to physical activity, taking your medications, and other lifestyle changes you will be making after your surgery.

Healing After Surgery

When you first get home from the hospital, you will focus on making steady improvement each day while slowly increasing activities according to your surgeon's instructions. See SecondsCount's discussion of Long-Term Recovery for information on caring for your incisions and monitoring for signs of infection.

Smoking Cessation

Smoking damages artery walls and contributes directly to coronary artery disease, the disease process that created blockages in your heart arteries. Heart bypass surgery did not cure your heart disease; it only bypassed serious blockages. If you smoke, quitting is essential to slowing the progression of your heart disease. Support is available to help you quit. The tools and resources here can help you get started on quitting and assist you along the way.

Medications

When you leave the hospital, you will have prescriptions for medications aimed at promoting healthy, comfortable healing from the surgery and reducing risk factors for future heart attacks. If you were already taking these medications, you may have new dosages. After coronary artery bypass graft surgery you will probably receive prescriptions for medications: to reduce cholesterol, antiplatelets and aspirin to prevent blood clots, beta-blockers and ACE inhibitors to help lower blood pressure, and nitrates to control chest pain (if some diseased blood vessels could not be bypassed).

Eating a Healthy Diet

As with smoking, a poor diet will

continue to contribute to your cardiovascular disease. Coronary bypass surgery may have saved your life or lessened or stopped chest pain, but it did not cure the heart disease process, which is progressive. A heart-healthy diet that is low in cholesterol and saturated and trans-fats can slow or stop the build-up of plaque on artery walls throughout the body. If you have not already spoken with a nutritionist, ask your physician for a referral to one who can help you design a plan for healthy eating.

Cardiac Rehabilitation

This structured program, often referred to simply as “cardiac rehab,” offers medical support and assistance in adopting a heart-healthy lifestyle.

Through cardiac rehab, patients have opportunities for exercise that is monitored by a medical professional, nutrition counseling, and psychological counseling, among other offerings. The importance of cardiac rehab cannot be stressed enough: Research has shown that heart disease patients who complete cardiac rehab are more likely to be alive in five years than those who do not. Cardiac rehab is covered by Medicare for eligible patients.

Physical Activity

Your physician or physical therapist will give you exercise guidelines for after your surgery. One of the best ways to restart (or start) physical activity after surgery is to participate in a cardiac rehab program at your hospital, where you can have the reassurance of being monitored by health professionals.

For at least the first six weeks after your surgery, you should not lift anything that is over 10 pounds. Your sternum (chest

bone) will need this time to heal. As you return to physical activity, walking is an excellent choice for gradually rebuilding your activity level.

Sexual Activity

It is common to feel shy about asking when it is safe to resume sexual activity after bypass surgery. However, you should feel comfortable in asking your surgeon for guidelines.

While your doctor's recommendations will be tailored to your health and circumstances, generally speaking, once you have been cleared by your doctor for physical activity, sexual activity is also approved. It is also important to note that one-half to three-quarters of patients experience sexual problems after a heart event due to heart disease, side effects from medications, depression, or fear of straining the heart.

Diabetes Management

Diabetes contributes to cardiovascular disease, and coronary artery bypass graft surgery is often recommended over other treatment options for diabetes patients with blockages in multiple arteries. A key part of your recovery if you have diabetes will consist of carefully managing the disease in conjunction with your healthcare providers.

Stress Management

Stress and coronary artery disease create a vicious cycle: chronic stress appears to be a risk factor for heart disease, and a diagnosis of heart disease (or a heart event followed by treatment such as coronary bypass surgery) is stressful. Medical researchers are not sure exactly how stress contributes to heart disease, but the

connection is clear. Learning how to manage your stress is part of a heart-healthy lifestyle.

Combating Depression

Many patients feel sad or overwhelmed after a heart event or surgery, but you should be aware that many heart disease patients experience clinical depression. Like stress, depression is also a risk factor for heart disease. Research has shown that depression can increase the likelihood of heart disease, a heart attack, or sudden death from heart problems. If you are concerned that a normal reaction of sadness after coronary bypass surgery is becoming long-term, clinical depression, seek help from a psychologist with experience working with heart patients (if possible). A hospital's cardiac rehab program is one excellent source for identifying a psychologist who can help you.

PIH is Port Moresby's largest private hospital offering more than 14 specialties under one roof, with specialists and technologically advanced equipment being utilized to bring modern healthcare to PNG.

PIH has invited a cardiac specialist from overseas to come down to Port Moresby to handle open-heart surgeries. Do call us at 79988000 for any query that you might have. You can also email us at info@pihpng.com

The information available in this feature related to images, graphics, text and other content is available for educational purposes only. Seek the advice of your doctor in respect to questions on a medical condition or treatment and do not disregard the doctor's professional advice after reading information on this blog.



OPEN HEART SURGERY IN PORT MORESBY AT K45,000* ONLY

PIH is inviting a specialist from overseas to conduct open heart surgeries here in Port Moresby. PIH will be offering it at a special discount of 25% for a limited time period.

Why fly abroad, when you can get it done for cheaper and at world-class quality of care?



**CALL US TODAY !
LIMITED SLOTS ONLY !!**

**HELPLINE
7998 8000**

* T&C Apply

Nupela TB marasin bilong ol pikinini

I gat wanpela nupela projek bilong helpim ol pikinini husat i kisim sik tuberkulosis (TB) we ol i wok long traim nau long Pot Mosbi Jeneral Haus sik.

Dispela projek em bilong mekim isi long ol pikinini nap long amamas long kisim marasin bilong sik TB.

Dispela projek bai go nap 12-pela mun na em i gat marasin bilong ol pikinini we ol inap long putim long wara na i gat gutpela teis long ol pikinini inap kisim planti marasin long wan wan de.

Australia i givim K542,000 long kamapim dispela paillet projek long baim ol dispela marasin na givim aut long ol helt woka i givim long ol pikinini na tu long kamapim ol protokol bilong bringim i go long olgeta hap bilong kantri.

Australian Hai Komisn Kaunsela bilong Helt na HIV,



Ol lain i makim ol patna ogenaisesen long dispela projek i holim nupela kain marasin bilong ol pikinini long Pot Mosbi Jeneral Haus sik long dispela wik. *Poto: AHC midia*

Christine Sturrock i bin tok tok long taim bilong opim projek olsem nau yet long PNG, i no gat ol marasin we ol pikinini bai laikim.

"Ol pikinini i save dring ol marasin we ol i bin wokim bilong ol bikpela manmeri na em ol i save painim hatwok long daunim, olsem na ol i save katim long hap, hap na

brukim long dring wantaim wara. Na dispela i save kamapim teis i no gutpela.

"Tritmen bilong TB i save stap inap 6-pela mun, na wantaim ol pikinini ol i mas kisim marasin olgeta de long wanem kain we ol inap long kisim tasol ol i mas mekim long pasin we ol pikinini bai laikim, em i gutpela," Mis

Sturrock i tok.

"Samting olsem 7,000 pikinini i save kisim sik TB long olgeta ya insait long PNG na 10 pesen bilong ol i save dai wantiam ol kain sik olsem na planti i save kisim bagarap long bodi olsem sik sotwin na kru i bagarap.

"Dispela i no mas kamap bikos TB em i wanpela sik we

em inap pinis wantaim marasin. Gutpela pasin bilong kisim marasin i stap tasol em i no save go long long ol lain husat i nidim tru, olsem ol pikinini," em i tok.

Dokta Henry Welch, husat i wanpela paediatrician o dokta bilong ol pikinini insait long Pot Mosbi Jeneral Haus sik i tok, "TB long ol pikinini i no save kisim bikpela luksave tumas long bipo tasol nau wantaim dispela gutpela wei bilong kisim TB marasin, em i bikpela samting tru.

"Dispela projek bai bungim ol marasin we ol pikinini bai laikim, wantaim ol narapela ektiviti long helpim ol pikinini husat i gat sik TB. Mipela laik lukim sampela bikpela senis long moa pikinini bai inap kisim gut TB marasin olgeta taim inap ol i pinisim gut olgeta narasin dokta i makim," Dokta Welch i tok.

Lokal memba helpim Goroka haus sik

Loutova Siapea i raitim

GOROKA Provinsal haus sik bai lukim sampela senis i kamap insait long ol wod bilong en.

Lokal Memba bilong Goroka, Bire Kimisopa i tokim ol Isten Hailans Provinsal Helt Atoriti olsem em i laik helpim ol siklain long ol i ken sindaun na slip gut long taim ol i slip long haus sik.

"Mi bin go lukluk raun long haus sik na luksave olsem haus sik i nidim wok mentenens, olsem na mi kisim ol kontrakta long kamap long haus sik na stretim gut dispela ol

eria we i wok long bagarap na bruk nabaut," Kimisopa i tok.

Em i tok, ol sikman, meri na pikinini i save i go long haus sik long kisim marasin, kamap gut na i go aut gen. Tasol ol dispela samting we i wok long bagarap na bruk nabaut, em i no inap helpim ol siklain long kamap orait.

Kimisopa i tok em bai lukluk long stretim gut wod 2 na wod 5 long putim ol gutpela plua, ol bet bilong sikman, ol toilet na was was rum.

Wod 5 em wod bilong ol lain husat i gat sik long long o kru i paul.

Eking Sif Eksekutiv Opisa bilong Isten Hailans Provinsal Helt Atoriti Joshua Soso i tok amamas olsem Mista Kimisopa bai givim helpim long stretim gut ol wod.

"Dispela helpim yu givim em bilong gutpela bilong ol pipel long distrik na ilektoret bilong yu. Na helt sevis em i no bilong ol pipel bilong distrik bilong yu tasol bai kisim. Helpim bai i go tu long ol pipel long 8-pela distrik long provins husat i save kamap long kisim sevis long Goroka Provinsal Haus sik", Soso i tok.



Lokal Memba bilong Goroka Bire Kimisopa i mekim sampela tok pilai na lap wantaim ol sumatin bilong Hailans Rijonel Koles ov Nesing long taim em i bin lukluk raun long Goroka Provinsal Haus sik. *poto: Loutova Siapea*



TOKAUT NAU!!

Special Features and Supplement

The best way to get the information to the mass populace in PNG and get it delivered right into the remotest villages by publishing in Tok Pidgin "Wantok niuspepa".

Get the grassroots people involve in taking ownership of developments in business, Health, Education, Politics, Agriculture, Climate Change, Banking, Law Order and more etc.

Wider distribution networking in the country using the four mainline churches (Catholic, Lutheran, Anglican and the United Church of PNG) Wantokniuspepa goes to remotest places and villages where other news papers don't reach.

Very affordable advertising rates, longer shelve life and many more pass on readership.

Your special events, achievements, product, services or information can be read, call us now!

Ph: 325 2500 Fax: 325 2579

Email: lbents@wantokniuspepa.com

tekari@wantokniuspepa.com

sfarapo@wantokniuspepa.com

Advertising

Mobile: 75530581

Mobile: 71963704

Mobile: 76622895

Mobile: 73846688



Liklik fama i as bilong gutpela sindaun long Papua Niugini

YUMI save toktok planti long olsem, bilong wanem na olgeta developmen i stap long Mosbi na liklik tasol long ol provins.

Yumi toktok planti tu long sevis bilong gavman i no moa go long ol pipol. Nau mi laik stori liklik long ol fama bilong yumi na long bikpela kontribusen ol i mekim long helpim ikonomi bilong kantri.

Insait long Papua Niugini yumi pulap long olgeta kain risos we yumi inap yusim long mekim mani. Yumi pulap tu long save bilong wok gaden na ol arapela save bilong lukautim yumi yet.

Nesenele ikonomi bilong yumi long dispela taim i sanap antap long pasin bilong rausim ol mineral na ges na wel long graun, rausim ol pis long Solwara na katim diwai na salim bilong kisim mani.

Dispela em ol bikpela wok na mani i kam bek i save stap long lukaut bilong gavman.

Gavman i amamas long dispela na i no givim gutpela luksave long ol liklik fama bilong yumi. Em i ting welpam em i makim sekta bilong egrikalsa. Tasol sori, welpam i no save pulimapim hangre bilong ol pipel long kaikai tru.

Inap long planti yia nau ol liklik fama i lukautim gut graun na ol pipel long ol ples. Yumi skelim, bipo long Spesel Egrikalsa Bisnis Lis (SABL) i kamap, sistem i paulim planti graun long ol pipel, 97 pesen bilong graun i stap long han bilong ol pipol. Opis bilong Statistiks long PNG i tokim yumi 85 pesen pipol i stap long ples.

Dispela i min olsem bikpela namba bilong ol pipel i mekim wok gaden long graun bilong ol yet. Long pasin bilong ikonomiks, wok gaden em i stap aninit long infomol sekta. Tasol bikpela lain pipel i mekim wok olgeta taim na planti taim i no save gat hangre long ol ruel ples.

Insait long wok bilong groim kaikai, ol fama i lainim na seim taim ol pikinini tu i lainim pasin bilong stretim graun na groim kaikai. Taim kaikai i redi ol i save serim na mekim ol bikpela wok kastom. Wok gaden em i wok bilong famili. Papa, mama na ol pikinini i save bung wantaim na mekim wok.

Pe bilong dispela wok em kaikai, pasin bilong serim, famili i stap wantaim, amamas na gutpela sindaun.

Dispela ikonomi we i no nidim kes mani em i wanpela tingting we gavman bilong yumi i no laik luksave long en na sapotim ol liklik fama.

Nogat, em i laik sapotim ol bikpela kampani husat i save mekim bikpela bagarap long graun, bus na wara taim em i laik kisim ol risos.

Dispela ol kampani i save brukim ol komyuniti tu na planti kros na pait pasin i save stap. Moa yet dispela ol kampani i save kisim ol papa i go wok long ples i longwe na lusim mama wantaim ol pikinini i stap.

Long sampela hap mama tu i save go wok long kampani na ol pikinini i stap long lukaut bilong ol bubu o sampela taim ol i raun nabaut tasol na stap.

Wok kaikai em i namba wan samting. Wok bilong kes moni em i namba tu. Yes Papua Niugini i nidim sampela bikpela mani na dispela em i min gutpela menesmen bilong ol risos.

Tasol long givim luksave long ol liklik fama em i min olgeta pipel i ken i gat kes mani na bai i no gat nid long singaut long ol arapela kantri long helpim na pasin bilong opim bel bilong graun long kisim risos i ken malolo liklik.

Ating em i taim gavman i mas givim sampela gutpela luksave long liklik fama. Dispela mi bilip bai i daunim planti hevi bilong ol yangpela nau insait long ol taun na siti.

PNG ken lainim gutpela samting long Siapan: Ove

Paul Zuvani i raitim

PAPUA Niugini i ken lainim planti gutpela samting long ol manmeri bilong Siapan, Bernadette Ove, Hetmistes bilong Jubilee Katolik Sekendari Skul long Pot Mosbi i tok taim em i tok tenkyu long ol des na sia wanpela Siapan skul i givim long ol PNG skul long Fincorp Haus, Pot Mosbi las wik.

Em i tok maski ol manmeri bilong Siapan i kisim bagarap, ol i no sindaun na sori long hevi i kamap tasol ol i kirap na mekim wok long strongim ol yet.

Ove i tok tenkyu long Sendai Ikuai Gakuen Hai Skul bilong Siapan long givim ol des na sia long sampela skul long Nesenele Kapitel Distrik na Sentral provins.

Em i tok Gavman bilong Siapan i bikpela poroman bilong wok developmen long Papua Niugini stat long taim PNG i kisim Indipendensi kam inap nau na PNG i no kirap nogut long lukim kain helpim.

Em i tok aninit long teknikal program, JICA (Siapan Intanesenele Koporesen Asistens), Papua Niugini i kisim



Ol sumatin bilong Sogeri Nesenele Hai wantaim ol nupela desk na sia Sendau Ikuai Hai Skul i givim.

planti helpim long Siapan na ol skul i save kisim dispela helpim tu.

Wanpela bilong dispela ol skul we i bin kamap na i wok long kisim helpim yet long Gavman bilong Siapan em Pot Mosbi Nesenele Hai Skul.

I no long sait bilong mani na ol samting bilong mekim ol wok tasol long save Siapan i givim taim ol saveman bilong ol i kam na skulim ol manmeri long wei bilong mekim na kamapim ol wok long ol volantia tisa program bilong en.

Narapela bikpela samting Gavman bilong Siapan i mekim tu em long helpim ol skul pikinini long Papua Niugini long EQTV we Edukesen Dipatmen i

yusim long soim ol program bilong en long ol praimer skul insait long kantri.

"I gat planti ol arapela bikpela helpim Gavman bilong Siapan i save givim tasol long dispela taim mi makim maus bilong foapela skul husat i kisim helpim long desk na sia we wanpela skul bilong Siapan i givim long mipela," Ove i tok.

"Sendai Ikuai Gakuen Hai Skul i bin givim ol desk na sia long faivpela skul, foapela long Nesenele Kapitel Distrik na wanpela long Sentral provins.

"Tasol foapela tasol i kisim dispela ol desk na sia na dispela ol skul em Ward Strip Praimeri Skul, Pot Mosbi Nesenele Hai Skul, Jubilee

Katolik Sekendari Skul na Sogeri Nesenele Hai Skul.

"Paradise Sekendari Skul tasol i no kisim bikos ol i givim bilong ol i go long Sogeri Nesenele Hai Skul. Sogeri Nesenele Hai Skul i mekim ol nupela klasrum tasol i nogat tebol, des na sia long pinisim wok.

"Moa long dispela Paradise Sekendari i tok ol i gat inap des na sia long dispela taim na olsem ol i nogat bikpela nid long kisim nupela.

"Mipela i tok tenkyu long Paradise Hai long skelim tingting na givim bilong ol i go long Sogeri Nesenele Hai," em i tok.

Ove i tok Sendai Ikuai Gakuen Hai Skul i givim dispela ol des na sia bi-

hain long ol i kisim helpim long Gavman bilong PNG, ol oganaisesen na faivpela skul we i salim mani samting i go long Siapan taim bikpela guria na hai wara i bagarapim sampela hap bilong ol long 2011.

Long makim maus bilong Sendai Ikuai Gakuen Hai Skul, Jun Ogata, Dairekta bilong Ikuai Intanesenele Sentra i tok helpim Papua Niugini Gavman na ol pipel bilong en i givim i bikpela na helpim tru ol manmeri bilong Siapan. Na Sendai Ikuai Gakuen, we i bin stat long 1905, i kisim bikpela hevi long 2011 tasol i kisim gutpela helpim long sapot PNG i givim.

Long soim tok tenkyu bilong en Hai Skul i givim ol des na sia long soim tenkyu bilong ol long ol skul husat i givim helpim long taim bilong hevi i kamap.

Long dispela wok-abau Sendai Ikuai Gakuen i mekim Sogeri Nesenele Hai olsem sista skul bilong ol.

Dispela i min tupela skul bai lain long ol samting long wanpela na narapela.

Bavaroko Praimeri skul holim Nesenele Buk Wik

Frieda Sila Kana i raitim

RITIM, Lainim na Go Het na Develop em i bikpela tingting bilong Nesenele Buk wik we i bin stat long Mande Ogas 1 na i pinis long Fraide Ogas 5 na planti skul long kantri i bin givim luksave long dispela bikpela taim long kalenda bilong skul yia bilong ol.

Bavaroko Praimeri Skul long Pot Mosbi i bin wanpela bilong ol dispela skul. Na long taim we Nesenele Laibreri na ol skul i wok long tingim ol bikpela man na meri bilong politik, na edukesen long go na opim buk wik bilong ol, ol oganaising komiti bilong dispela praimer skul aninit long lukaut bilong Misis Rhonda Suang i bin tingting long singautim ol niuspepa ripota o edita long opim dispela wik.

Long dispela taim, Misis Suang i bin askim Wantok Niuspepa long go na kamap ges spika long opim Nesenele Buk Wik bilong ol. Edita bilong Wantok Niuspepa, Misis Veronica Hatutasi na namba tu edita, Misis Frieda Kana i bin go na opim dispela buk



Misis Suang, ogenaisa bilong Nesenele buk wik long Bavaroko Primeri Skul i sanap Edita bilong Wantok Niuspepa na meri raitim buk, 'Behind the Blockade', Misis Veronica Hatutasi. Foto: Frieda kana



Misis Frieda Kana i toktok long ol sumatin long wanem em i gutpela long save long ritim buk na kirapim laik bilong ritim ol buk.

wik na toktok long ol sumatin.

Misis Frieda Kana i tokim ol sumatin bilong Bavaroko olsem, pasin bilong ritim buk em i bikpela samting long laik bikos ol pipel husat i save kamapim senis long wol, em ol lain we i save rit planti na kisim planti save long ol samting. Em i tok tu

olsem, Wantok Niuspepa i save putim ol nius na stori we i wankain olsem i save kamap tu long TVWAN, EMTV na Post Courier o National Niuspepa tasol em i save kamap long Tok Pisin. As bilong dispela em bikos ol nius ripota i save rit planti olsem na ol inap long tanim Tok Inglis i

go gut long Tok Pisin.

Editor bilong Wantok Niuspepa, Misis Hatutasi i tok, em i bin inap long raitim wanpela buk long stori bilong em yet taim em i bin stap insait long Bogenvil Kraisis bikos em i save ritim planti ol buk long taim em i liklik yet i kam inap em i bikpela na i go long Yunivesiti.

"Mi save laikim long ritim buk taim mi liklik yet. Mi bin save long ol kain buk olsem, 'Sleeping Beauty,' Snow White, Little Red Riding Hood, Cinderella na planti moa," em i tok.

Misis Hatutasi i bin tokaut tu long buk em i bin raitim, 'Behind the Blockade' na em i tok bikos long bikpela laik bilong em long ritim ol buk em i bin lainim gut we bilong raitim buk na nau em i raitim pinis na i stap long maket bilong salim.

Misis Suang i makim maus bilong ol tisa na i tok tenkyu long tupela bikmeri bilong Wantok Niuspepa long toktok long ol pikinini.

"Tenkyu tru long gutpela toktok bilong yu-tupela. Em i sut stret long nid bilong ol sumatin na em bai kamap as bilong skul

ektiviti bilong mipela long dispela buk wik," Misis Suang i tok.

Em i tok moa olsem nau long dispela taim, ol yangpela pikinini i no save laik ritim buk bikos i gat senis i kamap wantaim ol teknoloji olsem mobail fon na muvi piksa we ol pikinini i no moa rit. Em i tok, raitim Tok Inglis long skul tu i popaia nau bikos ol pikinini i yusim kain rait we ol i save mekim long ol mobail fon.

Bavaroko Praimeri Skul i pinisim wik bilong ol wantaim wanpela dibeit o tok resis nameri long ol gret 8 klas yet. As toktok em, 'Praimeri Minista O'Neill i mas step daun o No gat.' Ol gret 7 i resis long ese o skrip bilong stori o pilai, ol gret 6 i wokim pilai we ol i makim ol manmeri insait long ol buk we ol i ritim, ol gret 5 i raitim buk ripot, ol gret 4 droim ol bikpela posta long buk wik na gret 3 i putim ol displei o bilas wantaim ol dro na rait bilong ol ausait long ol klasrum bilong ol. Ol i bin holim klosap sere-moni long Mande bikoren i bagarapim asem-bli graun bilong ol long Fraide 5 Ogas.

Singaut bilong moa meri saintis

Paul Zuvani i raitim

MOA meri i mas kamap saitis na sapot long ol i lainim mets na saiens, Dokta Meghan-Tomasita Cosgriff-Hernandez bilong Amerika i tok.

Hernandez husat i antropolojijis i mekim dispela tok taim em i givim tok long Amerika Kona, wanpela hap insait long Pot Mosbi Laibreri long las wik.

Em i tok ol meri i gat wankain strong na save olsem ol man tasol bikos sosaiti i no givim gutpela luksave dispela i mekim planti meri i no soim strong na save ol i gat long mekim ol long komyniti.

Em i tok planti ol sosaiti long graun we kastom na kalsa i no save sapotim ol meri long tingting bilong ol i lukim planti meri i stap nating na lukautim famili tasol.

Na narapela samting em long ol kain envairomen o ples we i gat ol bikpela mauten, wara, tais na birua na dispela i pasim ol meri long go moa na soim strong na save bilong ol long mekim ol wok.

Tasol em i tok dispela kain pasin bilong lukdaun long ol meri inap senis taim sosaiti i senis na stat long givim gutpela



Dokta Meghan-Tomasita Cosgriff-Hernandez (fran) i givim toktok long sapotim gut ol meri.

Poto: Paul Zuvani

luksave long ol meri.

Nau yet Hernandez i wok wantaim Person Missing in Action (PIA) long Woa Ejensi, wanpela NGO grup we i wok long painim bun bilong ol manmeri bilong Amerika husat i lus long taim bilong pait na kisim i go bek long Amerika.

Em i tok wantaim sapot bilong Gavman na ol manmeri bilong Papua Niugini PIA bai skruim yet dispela wok i long kantri inap long em i pinisim olgeta hap bilong kantri long wok

bilong kisim ol bun.

Em i tok Gavman bilong Amerika i luksave olsem inap long 3000 manmeri bilong en i lus long taim bilong woa long PNG.

Hernandez i tok i nogat planti meri i stap long tim bilong mekim kain wok na olsem em i askim moa meri long kamap na mekim wok olsem em.

Long sapotim tok bilong en, Embasada bilong Amerika long PNG Catherine Ebert-Gray i tok long kantri i kamap gut, man-

meri wantaim i mas sanap na mekim wok.

Long dispela as i mas gat moa sapot long ol meri long sait bilong skul long ol i kisim save na mekim ol wok.

Em i tok PNG sosaiti i mas senisim tingting em i gat long givim luksave long ol meri.

Na long sait bilong painim ol bun bilong ol manmeri i lus long woa em i tok long wok wantaim MIA ol oganaisesen olsem Nesenel Misium na Art Galari, PNGDF, polis na sampela praiwet oganaisesen i helpim long dispela wok.

NAQIA givim luksave long meri opisa

Gary Fagan i raitim

NESENEL Egrikalsa Kwarantin na Inspeksen Atoriti (NAQIA) i makim sampela wokmeri long kamap ol bosmeri long wanwan seksen taim em i givim luksave long ol i no long-taim i go pinis.

NAQIA Menesing Dairekta Joel Alu i tok em i gutpela ol meri opisa i kisim wankain luksave olsem ol man opisa long ranim ol bikpela opis.

Alu i mekim dispela tok taim em i sainim 3-ya kontrak wok

long nupela jeneral menesa bilong koporet afeas divisen bilong NAQIA Edwina Tago. Saining seremoni i bin kamap long hetkwata long Pot Mosbi we ol bosman bilong ol arapela divisen bilong NAQIA i bin stap na lukim.

Long seremoni Alu i tok wankain luksave bilong stap na bosim ol opis i mas go long ol meri tu. Aninit long lukaut bilong Alu NAQIA i givim pinis luksave i go long tupela meri long holim



Edwina Tago, nupela jeneral menesa long koporet services divisen bilong NAQIA.

bikpela opis.

Dispela tupela meri em Dokta Amanda Mararuai, husat nau i senia teknikal opisa bilong ol diwai samt- ing na Edwina Tago husat i kamap jeneral menesa long koporet services divisen bilong NAQIA. Dispela ol makim i bihainim disisen bilong NAQIA Bod.

Long kamap jeneral menesa dispela i namba wan taim taim NAQIA i makim wanpela meri long holim kain wok olsem.

Yangpela PNG meri kisim namba long Saina yunivesiti



Yalinu wantaim papa na mama bilong em taim ol i kamap long greduesen bilong em long Saina.

WANPELA yangpela meri Papua Niugini, Yalinu Poya husat i go long skul long Saina long tupela yia i go pinis, i greduet pinis wantaim Masta Digri long Inorganik Kemistri. em i kisim tu luksave wantaim Yunivesiti Kaunsil Awot ov Ekselens olsem wanpela sumatin husat i mekim nambawan wok tru long skul bilong em.

Mis Poya, bilong Pangia, Sauten Hailans, i bin go long Saina long kisim masta digri bilong em aninit long Saina Gavman Skolasip we Edukesen Pasifik Ejensi (EPA) i bin lukautim long kisim ol sumatin bilong stadi insait long ol yunivesiti bilong Saina long ol pos greduet stadi.

Long 26 Jun 2016, Mis Poya i greduet wantaim Masta Digri long Northeast Normal Yunivesiti insait long Jilin Provins, Sania.

Mis Poya i bin wokim risets bilong em long Synthesis na aplikesen bilong Polyoxometalate Catalysis long ol industri olsem kaikai, pepa o tekstail menufeksa na long pising. Em i wokim risets bilong em long wanpela bilong ol 6-pela leboratri long wol we i save lukluk moa na wokim ol risets long Polyoxometalate Catalysis.

"Risets mi wokim em wanpela industri we i wok long go bikpela nau na planti pipel long wol i gat bikpela laik long en na dispela kain save em ol i save yusim long ol bikpela kain industri bilong kamapim ol samt- ing bilong wok. Mi hop olsem PNG bai kisim tu dispela kain saiens na putim long kemikel industri bilong en bikos em i isi long yusim na i no inap bagarapim envairomen na i no dia tumas," Mis Poya i tok.

Mis Poya i tok em i amamas olsem em i makim Sania long wokim masta digri bilong en bikos Saina em i wanpela ikononi we i wok long kamap nau olsem wanpela ikononi pawa haus na tu long saiens na teknoloji long wol. Em i tok Sania i gat ol leboratri na ol fasiliti we i gat olgeta samting na em i laikim ol narapela yangpela meri tu long go kisim skul long Saina.

"I gat 4-pela samting i bringim mi long mekim ol driman bilong mi i kamap trupela. Em long harim tok bilong God, harim tok bilong papamama na strongpela tingting bilong mekim gut," mis Poya i tok.

Em i strongim ol narapela yangpela PNG meri long ol i mas putim mak bilong ol antap na kisim inapim wanem kain driman ol i gat long laip bilong ol.

SAVE na MEKIM

Sapta 2

...moa yet long hap 1

(Kaukau)

I gat kain kain kaukau. Sampela i swit long man i kaikai, na sampela em i no swit tumas. Sampela i save karim planti kaikai hariap, na sampela i no save karim gut.

Olsem na yu yet ken tingim na skelim, wanem kaukau i swit long yu na wanem kaukau i save karim tasol na planim kaukau. Orait, kisim rop bilong dispela kain kaukau tasol na planim. Nogut yu kisim nabaut, na hatwok bilong yu i no karim planti kaikai.

Tok bilong planim

Kru bilong rop em i gutpela bilong planim. As na namel bilong en i no gutpela tumas. Kisim rop long gaden kaukau i gat kaikai pinis.

Sapos yu planim klostu klostu, bai kaikai i kamap planti tasol i no inap kamap bikpela bikpela. Planim longwe longwe bai kaikai i no kamap planti tumas, tasol i ken kamap bikpela bikpela.

Gutpela rot tru bilong planim em i olsem: Wokim raunpela maunten na planim. Narapela gutpela rot em i olsem: Wokim longpela maunten.

Sampela man i save planim nating long stretpela graun. Dispela kain i no inap kamapim planti kaikai tumas.

Tok bilong wanpela nupela rot bilong planim kaukau

Wanpela didiman bilong Filipins em i wok long Lae na i soim wanpela nupela rot bilong planim kaukau. Mipela sampela manmeri i traime pinis. I kamap gutpela.

Em i save planim kaukau long baret. Na bihain, taim kru i kamap strong, em i wokim maunten antap long em.

Rot i olsem:

1. Brukim graun pastaim. Bihain wokim longpela baret. No ken dikim i go daun tumas, liklik baret em inap.

2. Kisim longpela kru bilong kaukau. Kisim long gaden kaukau i gat kaikai pinis. Kisim, na yu no ken planim hariap. Larim i stap nating tupela de. Bihain slipim long baret na karamapim.

3. Larim i stap olsem na wetim lip i kamap planti liklik. Orait, nau apim ol rop na lip na wokim maunten antap long rop kaukau yu bin planim.



ELC Goroka Taun Seket holim konprens ileksen



GUTPELA PLEN BILONG GOD

Wanpela man i kam long God na autim wari bilong em.

Man: God, inap mi askim yu wanpela samting?

God: Ya, Yu inap!

Man: Tasol yu mas promis olsem yu bai i no kros long mi.

God: Mi bai i no inap kros.

Man: Bilong wanem yu givim mi planti samting nogut tude?

God: Wanem samting?

Man: Mi kirap leit long slip.

God: Wanem samting moa?

Man: Taim mi statim ka bilong mi, ka i no stat hariap.

God: Oh, OK! Na narapela?

Man: Burger mi order long brekfas i no olsem mi save askim. Mi les long kaikai.

God: mmmmm...wanem moa?

Man: Taim mi draiv kam bek long ofis, mi toktok long sampela bisnis patna bilong mi. Mobail fon bilong mi wantu tasol indai. Mi belhat ya!

God: Em i tru. Wanem moa?

Man: Taim mi kamap long haus, mi laik rileks wantaim nupela massage masin bilong mi, mi baim em asde. Tasol wantu tasol masin indai. Pawa i stap tasol masin indai.

Olsem na! Bilong wanem olgeta samting i no stap stret tude?

God: Ok. Bai mi mekim klia bilong wanem samting i no kamap gut long yu tude. Long moning, i gat wanpela ensel bilong indai i kamap long yu, laik kilim yu. Tasol mi bin salim ensel bilong mi i kam long yu na pait wantaim ensel bilong indai, olsem na indai i no kamap long yu tude. Mi bin larim yu slip, olsem na yu kirap leit.

Man: Oh, Tasol....

God: Mi no laik enjin bilong ka bilong yu i kamap laip hariap, bikos i gat wanpela draiva i spak na draivim ka long rot i stap long fran bilong haus bilong yu. Sapos ka bilong yu i bin kirap long taim na yu draiv aut wankain taim, em bai bamim na kilim yu indai.

Man: (daunim het tasol).

God: Man bilong wokim burger bilong yu i sik. Mi no laik bai yu kisim sik. Olsem na mi wokim krangi wok bilong em na yu bai inap kaikai burger bilong yu.

Man: (pulim strongpela win)

God: Mobail fon bilong yu mi kilim indai. Bikos ol man i toktok wantaim yu, ol giaman lain. Mi no laik bai ol i giamanim yu. Sapos yu toktok na draiv, em bai paulim tingting bilong yu tu. Yu bai i no lukim rot stret. Nogut yu bamim narapela ka.

Man: (Wantaim aiwara i pulap long ai bilong em) i tok: Nau mi save God....

God: Toktok long massage masin bilong yu. Mi mekim em i dai bikos yu no baim Easypay bilong yu yet. Taim yu kirapim Massage masin bilong yu, em i bai kaikai planti pawa. Mi bilip, yu no laik stap long tudak long bikpela nait inap long moning.

Man: krai na i tok: "Plis Pogivim mi...mi tok sori God...."

God: Yu noken wari. Maski long tok sori long mi. Yu mas lainim na kamap bilip long Mi. **Bikos Plen bilong mi i go long yu, i winim plen bilong yu".**

Paulus Tali i raitim

EVANJELIKAL Luteran Sios (ELC) Goroka Taun seket konfrens namba 2, i bin kamap long Nesenal spots Institiut long Goroka, Isten Hailans long Julai 28 i go pinis long Julai 30, na moa long 100 deliget i bin kamap.

Goroka Taun seket i gat tripela paris, St Mathew long Not Goroka, St Paul long taun, na St John long Wes Goroka. Konprens i ran wantaim baibel stadi, we Pasta Barry Makyui, husat bin greduet las yia long Martin Luther semineri i bin go pas long en.

Wantaim ol baibel stadi, em i salensim ol lida bilong paris, bihanim het tok, 'Birua bilong kraisi'. Em i tokim ol lida, "Sapos yumi laik kamap wok man meri bilong God, long sios, bai i gat kain kain salens long laip bilong yumi olsem na yumi mas lukaut gut, pasin bilong satan, em man bilong giaman

Goilala Katolik grup i bringim gutnius

WANPELA Katolik Kristen grup bilong Fane Paris insait long Goilala distri, Sentral Provins nau i stap long Pot Mosbi long bringim Gutnius bilong Tok bilong God long ol wantok bilong ol i save stap long olgeta setelmen long Pot Mosbi.

Tasol long las wik wanpela mausman bilong ol, Charles i bin kamap long Wantok Niuspepa opis na tok olsem ol dispela grup nau i stap long Kogeva Setelmen long Badili na ol i no gat mani olsem na ol i hangre nau. I gat 16 man, meri na pikinini olgeta i bin wokabaut long ples Fane i go daun long Kuniva, Vanapa na ol i kisim kar i kam long Pot Mosbi.

Ol i bin painim opis bilong Pot Mosbi Asdaiosis tasol ol i abrus na kam insait long Wantok Niuspepa opis.

we em bai kam bilong bagrapim bilip bilong yumi wan wan."

Pasta Makyui i givim baibel stadi, long bringim luksave bilong ol lida bilong paris na kongrigesen long ol i mas sanap antap long tok tru na autim Gutnius bilong Jisas Kraisi, we tok bilong God tasol bai inap long sevim ol kristen bilip manmeri. Na i no long bilip tasol, nogat em inap long senisim laip bilong yumi.

Las yia 2015, wankain konprens i bin kamap long Not Goroka, we St Mathew Paris i bin go pas long holim.

Ol kristen lida we i kamap long konprens em ol lida bilong ol mama, yut, na sande skul bilong ol i ken sanap strong long sapotim wok bilong Gutnius.

Longpela taim siaman bilong ELC Goroka Taun seket, Brian Koningi, husat i stap siaman bilong bung inap senis bilong em long 30 Julai 2016, i tok olsem em long wok bilong em olsem

siaman long seket long 10-pela yia em i bin givim moa taim bilong em long sios na i no tumas long wok bilong em yet. Mista Koningi em i wanpela praivet loiya.

Em i tok, "Mi stap olsem siaman inap 10-pela krismas na mi save givim moa taim long sios wok na i no tumas long wok bilong mi, inap nau bai mi givim moa taim long wok bilong mi, tasol mi i no lusim sios."

Konprens i pinis long 30 Julai wantaim holi komunien we St Johns kongrigesen givim diwai kros mak, i go long St Pauls paris long ol bai holim 2017 konprens.

Siaman bilong St Johns, Lapiso John, i tok, "Mipela i amamas long yupela kamap long yumi holim bung hia long NSI long toktok long wokabaut bilong sios, na i no long nem bilong yumi. Nau mipela givim konprens i go long yupela St Pauls."

Pasta bilong St Johns, Baital Graham, tu i tok amamas long ol kristen bilong St Johns, long sapotim konprens i kamap gut.

"Yumi ol lida i bung long paris, kongrigesen, seket, long luksave long ranim gut wok ministri bilong sios, insait long straksa, na plen bilong em, na bai sios inap wokabaut insait long mak bilong em," Pasta Baital i tok.

Long konprens, ileksen i bin kamap na ol i makim ol nupela lida, em; Siaman i go long Pasta bilong St Mathew, Not Goroka, Vais Siaman, Lapiso John, St Johns, Seketeri, Robin Johnny, St Pauls, Treseri, Amos Bone, St Mathew.

ELC Taun seket olupela siaman, loiya, Brian Koningi i tok amamas long ol nupela lida i kamap na em i tok pasin bilong wok bung na sapotim ministri bilong Gutnius i mas i stap.

"Long tok bilong God, tasol bai yumi inap lukim Senis," Mista Koningi i tok.

Tripela kongresen kam bek long mama Luteran Sios

Paulus Tali i raitim

BIHAIN long 22 krismas tripela kongrigesen long Banz long Jiwaka i go bek long mama sios Evanjelikal Luteran Sios.

Dispela i lukim ol i amamas tru long wanem planti ol memba i lusim bilip pasin bilong ol tasol i kam bek na join gen wantaim Evanjelikal Luteran sios.

Ol tripela kongresen em Karwagi, Sigi na Sigi Kompaun. Wantaim dispela, planti tausien memba husat i stap insait long dispela ol kongresen i kam bek tu.

Ol i kam bek taim Luteran Sios i holim wanpela konprens long Banz.

John Bari husat i pasta long Banz tasol nau i sumatin long Martin Luther Seminari long Lae tok em i gupela dispela ol kongresen i go bek long mama sios.

Em i tok kain senis bai lukim bilip bilong ol manmeri i kamap strong na ol i kisim bek ol sakramen bilong baptismo na komunio.

Long Banz bung inap olsem 200 manmeri i amamasim kam bek bilong ol tasol long wankain taim i tok tenkyu long God husat i was long ol inap long ol i senisim tingting na kam bek long mama Luteran sios.

Em i tok Banz seket i gat kain ol projek olsem hai skul, Luteran Kolis na ol arapela liklik sapot projek.

Em i askim ol long ol i no ken go bek long olupela bel na givim baksait long God na sios tasol ol i mas tanim bel tru na lukim gupela senis long laip bilong ol.

I bin gat planti ol so na toktok bilong God na dispela i lukim Pasto Bubiang na Pasto James Kimb i go pas.

Silva Jubili Selebresen bilong Pater Jacek

LONG namba 4 de bilong mun Ogas, 2016, Holi Spirit Semineri i bin selebretim Silva Jubili bilong Pater Jacek Tendej C.M, Rekta bilong Holi Spirit Semineri long Bomana, Pot Mosbi.

Selebresen i bin kamap long Holi Spirit Semineri Sapel yet we

Asbisop bilong Pot Mosbi, Reveren John Ribat i bin go pas long en wantaim Bisop bilong Altotau, Reveren Bisop Rolando Santos C.M na ol arapela sios opisal insait long Pot Mosbi.

Moa long en, ol pipel bilong Waima long Bereina Daiosis, Sentral

Provins i bin kam na lukim dispela silva jubili selebresen bikos Pater Jacek i bin stap planti yia long hap bilong ol. Ol singsing grup bilong Mekeo i kamapim planti stail bilong mekim Pater Jacek na ol ges bilong em i amamas na tok tenkyu long God long dispela 25 yia

em i givim long wok pater inap nau em i stap olsem Rekta bilong Holi Spirit Semineri long Bomana.

Bikpela samting long dispela de em, susa bilong Pater Jacek, Beata wantaim man bilong em Jacek i bin kam long selebretim dispela de wantaim em.



Pater Jacek i selebretim Silva Jubili bilong em.

Skelim na strongim gen ol lo bilong trefik na ol rot

OLGETA wik i gat ripot bilong ol manmeri na pikinini i save dai long ol eksiden long rot. Sampela i dai taim kar i bamim ol, o kar i kapsait, o tupela kar i bam. I gat planti kain stori olsem i kamap long olgeta provins long kantri. Ating hia long PNG, moa pipel i save dai o kisim bikpela bagarap long ol eksiden long rot long wanpela mun.

Planti ol dispela eksiden i save kamap bikos draiva bilong kar i spak na i kamapim birua long rot. Long dispela wik i gat stori bilong 8-pela pipel i dai long tupela rot eksiden long Isten Hailans. Long wanpela birua,

ol polis i painim olsem dring na spit i kamapim eksiden we 7-pela pipel i dai. Long narapela eksiden, i bin gat bagarap long kar na eksiden i kamap na draiva i dai.


Polis komanda long Isten Hailans i bin mekim strongpela tok lukaut long taim dispela tupela birua i kamap

. Em i tokim ol draiva long no ken spak na draivim kar. Na em mekim strongpela toktok tu long ol draiva i save spitim kar long ol ples we rot i no stret tumas na we eksiden inap long kamap.

Tasol ol draiva bai harim tok tu o nogat?

Dispela pasin bilong rekles draiving, o draiva i no wari long laip bilong ol pasindia, bai i no inap long pinis sapos i no gat pasin bilong tambu long dring long taim man o meri i holim stia bilong kar.

Pasin bilong testim gut ol lain-



draiva pastaim long ol i kisim laisens bilong draiv em i narapela bikpela kwesten yumi mas skelim.

I gat planti ol kauboi draiva long ol rot bilong PNG. Na i gat planti stori tu long olsem wanem ol dispela draiva i kisim laisens bilong ol.

Sampela stori i tok ol i givim wanpela K50 long ol lain i bosim

wok bilong givimaut laisens na ol i kisim hap pepa bilong draiv. Em i tru o nogat?

Em tu i narapela kwesten yumi mas skelim na painim rot long stretim.

I gat ol lo bilong trefik i stap. I gat lo bilong rot transpot atoriti i stap. Ol polis na ol opisa bilong gavman i mekim wok bilong

lukautim ol dispela lo na lukim olsem ol manmeri na ol draiva i bihainim stret lo.

Na yumi wan wan manmeri i save long pasin bilong stap gut wantaim ol arapela manmeri na mekim stret wok.

Sapos yumi tingim laip bilong ol narapela manmeri long taim yumi draivim kar, ating bai i no gat

planti eksiden tumas bai kamap.

Ol sain bilong soim spit bilong kar, ol ples nogut long rot na ol arapela trefik sain i mas sanap arere long olgeta bikpela na ol liklik rot tu long kantri.

Oltaim yumi save lukim ol nupela rot i kamap we gavman i spendim planti milien kina long wokim.

Tasol ol dispela rot i save karim ol trefik sain long tok save long ol draiva na ol manmeri i yusim rot o nogat? I luk olsem planti taim i no gat ol sain o sampela taim ol bikhet lain i save rausim ol sain i sanap arere long rot.

Ol bikhet lain husat i rausim ol trefik sain long rot i mas kisim bikpela mekim save long han bilong lo. Na ol draiva husat i dring spak na draivim kar i mas kisim bikpela mekim save tu.

Pasin bilong spak na kamapim eksiden we ol manmeri i dai bai i no inap pinis sapos yumi no strongim awenes bilong dispela hevi insait long komiyuniti.

Ol yangpela manmeri i mas kisim save bilong draivim kar gut. Ol i no ken spak na draivim kar. Ol pasindia i no ken kalap long kar sapos ol i lukim olsem draiva i spak.

I mas gat ol polis i patrol long rot na sekap oltaim long ol kar. Ol i mekim olsem ating bai ol draiva i no inap spak na draivim kar.

Dispela em sampela samting yumi mas skelim gen na strongim long mekim ol rot i seif na ol draiva tu i mekim stret wok bilong draivim kar na i no inap kamapim eksiden na kilim ol pasindia.

PNG bai kamap gut taim manmeri i senisim pasin na trastim God

PLANTI manmeri sapos ol i saveman o nogat, olgeta i save askim, "bilong wanem Papua Niugini i gat planti risos tasol manmeri i stap turangu?"

Sampela manmeri i raitim ol pepa o laik kisim digri na mekim kain askim long painim ansa bilong dispela askim.

Skelim Tingting tu long dispela kolom i mekim wankain askim na i traिम long painim ansa.

Em i ting PNG i kamap gut taim manmeri, stat long ol lidaman, i senisim tru pasin bilong ol na trastim God.

Skelim Tingting i givim ansa bihainim bilip em i gat long God husat em i bilip i mekim olgeta samtingheven na graun. Ansa i stap long Rom 7: 14-23 – Woa in-



sait long laip bilong yumi.

Em olsem long taim mipela i laik stap gut yumi i wok long pait long tupela woa, pait bilong bodi na pait bilong spirit.

Aposel Pol i mekim gutpela tok taim em i tok, "Mi no save long wanem as tru mi save mekim ol pasin mi save mekim. Ol pasin mi laikim tumas long mekim, em mi no save mekim. Tasol ol pasin mi no laikim tru, em oltaim mi save mekim," (Rom 7:15).

Ating long bodi wanpela i

ken save wanem samting i rong o asua na wanem samting i rait.

Gutpela piksa long save long dispela tok em tambu nau Nesenel Kapitel Distrik Komisen (NCDK) i mekim long salim buai long pablik ples.

Manmeri i save em i tambu long salim buai long pablik ples. Taim Siti Renjes o polis i no stap ol i salim buai tasol taim polis i stap manmeri i no salim.

Wankain long ol arapela samting, taim atoriti i no stap maski wanpela i save em i rong na asua long mekim, wanpela bai go het yet long stil, bagarapim samting o laip bilong narapela o bagarapim em yet.

Em bikos I gat dispela pait insait long laip bilong yumi

(Rom 7:23).

Olsem na Skelim Tingting i tok long Papua Niugini i kamap gut, manmeri i mas oltaim was long laik bilong bodi na spirit wantaim (Matyu 26: 41).

Na moa yet, maski Papua Niugini i gat planti busgraun, wel, ges, gol, kopa na pis tasol taim em i no bilip na bihainim lo bilong God em inap long kisim bagarap (Wok Pris -Leviticus 26: 16). Na taim em i bilip na bihainim lo bilong God em bai stap long gutpela taim (Wok Pris 26: 3-6).

Skelim Tingting i bilip taim manmeri i senisim pasin long bel na tingting na trastim God tru (Gutpela Sindaun- Prov 3: 5-6) Papua Niugini bai gat gtupela sindaun na bel isi.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantokniuspepa.com

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Krakow
WYD 2016



Wol Yut De long Poland



NU IRELAND DE 2016

I NAMBA WAN OLGETA!

TUPELA de Nu Ireland Provins i bin holim selebresen bilong 2016 Nu Ireland De, long 26 na 27 Julai, we planti tausen pipel i bin kamap long lukim na amamasim de.

Ges ov Ona, Ebeseda bilong Pipels Ripablik bilong Saina long Papua Niugini, Li Riyou i bin stap long lukim dispela dewantaim ol narapela bikpela man na meri (VIP) ges olsem Milen Be Gavana, Titus Philemon, ol deligesen bilong em na nupela memba bilong Saut Bogenvil, Timothy Masiu.

Nu Ireland Gavana, Sir Julius Chan, Memba bilong Kavieng Open, Ben Micah na Memba bilong Namatanai Byron Chan i bin stap sambai wantaim Siaman bilong Provinsal Ivens Kaunsil, Sir Noel Levi, long tok welkam na kisim ol visita bilong ol.

Namba wan de, long Tunde 26 Julai ol i opim selebresen wantaim ol spis o toktok bilong ol bikman na bihain ol i lukim namba wan raun bilong singsing kwaia resis, string ben na Mista na Mis Nu Ireland resis. Ol i opim ol stol long

ol bisnis inap soim ol samting bilong ol, long Konos Gavman Stesen long Sentral Nu Ireland.

Memba bilong Kavieng Open na Palamen lida bilong Pipel Progres Pati (PPP), Ben Micah i strongim ol Nu Ireland pipel long sanap na sapotim stret-pela pasin na em i tok klia moa long wanem as em i lusim gavman na i go long oposisen, maski sapos oposisen i lus long Vot i No gat bilip mosen.

Milen Bei Gavana, Titus Philemon i amamas long go long Nu Ireland long bekim dispela kain wokabout raun we ol Provinsal Eksekjutiv Kaunsil (PEC) memba bilong Nu Ireland i bin mekim i go long provins bilong em long Februeri dispela yia, na em i bringim wanpela deligesen bilong em i kam long Nu Ireland long lainim samting long ol.

Mista Philemon i tok em i gat bikpela amamas long dispela singaut na pasin susa provins wantaim Nu Ireland olsem em i wanpela step i go het bikos long tupela provins i gat planti samting i wankain.

Ol ektiviti i pinis long nait long Tunde long larim olgeta grup i soim stail na kala bilong ol long selebresen. Ol fainel raun bilong ol resis na ol wina i bin kamaut long Trinde, 27 Julai.

Long Tunde, Gavana, Sir Julius Chan i go bek long Kavieng long bungim ges ov ona, Embeseda Li Riyou na Saina Komyuniti long Kavieng we ol i holim wanpela spesel dina kaikai long welkam long Ekselensi i kam long provins pastaim long em i go long Konos long Trinde Julai 27.

Insait long toktok bilong em long namba tu de, Gavana Sir Julius Chan i tok, ol provins inap long kamapim senis long PNG, olsem na olgeta provins i mas wok bung wantaim long gutpela bilong ol pipel bilong PNG.

Em i tok tenkyu long ol lain husat i go pas long redim dispela de bilong selebresen long gutpela wok ol i mekim na ol bisnis haus husat i sponsa, long gutpela pasin bilong ol long givim helpim long holim Nu Ireland Provinsal De selebresen long dispela yia.



Bilas blong ol vanis - malagan i save rausim ol tevel na klinim ples pastaim long singsing o bung i kamap.



Ol yangpla meri Niu Ailan i bilas long kala bilong provins.



Tantanua i singsing long hamamasim Niu Ailan Dei.



Wanpla ngut o hetman long klen na man tu husat i save katim alagan, Edward Sale i bin wanpla long ol man na meri husat i kisim outstanding New irelander award long selabrasens displa yia.



Style mangi redi long kisim stage na soim kala insait long resis blong Mr na Miss Niu Ailan.



Bik lain man meri i bin kamap long Konos long stap na hamamasim Niu Ailan De.



Gavana Sir Julius, Gavana blong Milne Bay, Titus Philemon na Embassada blong China, Li Riyou i kamap wantaim long Konos.

Toro



Biabia



Kanage



Autim Tingting

Toksave i go aut long pablik olsem *Wantok Niuspepa* bai ranim gen "Autim Tingting" we ol Wantok rida na pablik i ken salim teks mesej i kam long ol tingting, wari na tok-tok yupela i gat long ol samting i kamap long komyuniti, provins na kantri, ol samting i karamapim sait bilong **sosel, politiks, ikonmik, sios, helt, edukesen** na ol bikpela samting i kamap long kantri. No ken salim teks i bagarapim ol sios, narapela manmeri, painim meri o penpren bikos *Wantok* bai no inap putim ol dispela long pepa. **Sapos yu laik painim famili memba, hauslain na wanpisin i lus na yu no save em i stap we**, yu ken salim teks i kam .

Edita bai gat fainol toktok long ol atikel bai kamap long pepa.

Telepon namba yu ken salim teks mesej i kam em:

71845906


Tenkyu tru
 Edita-Wantok Niuspepa

Ples Uria kukim stret...



Ol pipel bilong ples Uria long Usino LLG long Madang i gat kala kala bilas long singsing na pulim ai bilong o intenesenel turis husat i kam aninit long gavman turisem awenes program. *Poto Mathew Yakai - MY Midia.*

Em nau! Ol pikinini i ken painim rot i go long ples wantaim Wantok lain...



Yu pinis! Em ples bilong yu

STORI BILONG TUMBUNA

Taur pretim masalai

Bipo tru i gat wanpela boi wantaim susa bilong em. Tupela i stap long wanpela liklik haus klostu long wara.

Wanpela taim paiawut bilong tupela i pinis na susa bilong em i tokim em, mitupela go na brukim paiawut. Olsem na tupela i kisim naip wantaim akis na tupela putim long kanu. Na tupela kisim pul na tupela i pul i go.

Tupela i go sua long wanpela ailan na boi ya i laik pul na pul pas long diwai na wara i go insait long kanu. Olsem na susa i kirap paitim brata bilong em long pul. Dispela boi ya i lusim pul long kanu na em i swin i go long ailan. Em i go kamap pinis, na em i go antap na em wok long lukluk long susa bilong em i pul i go.

Orait susa bilong em i go sua pinis na em i pasim kanda bilong kanu na em i kisim naip wantaim akis na em i go antap na i go brukim paiawut. Tasol em i no lukim brata bilong em i hait long diwai na em i lukluk long susa bilong em, i no long taim pinis, wanpela masalai i harim pairap na em i kisim bikpela limbum i go na em i lukim meri ya i brukim paiawut olsem na masalai i kam klostu na em i pasim meri long limbum.

Taim liklik brata bilong em i lukim dispela em i kra i isi isi, nogut masalai i harim na em bai pasim olsem em i bin mekim long susa bilong em. Dispela masalai i karim meri i go na brata bilong dispela meri tu i wok long hait long masalai i kam. Bihain masalai i kamap long ples na em i tokim ol man bai mipela i gat bikpela singsing long dispela meri.

Liklik brata ya i kam long ples na bihain long wan wik em i kirap na i go. Em i kamap long ples bilong masalai na em i tanim olsem palai na em i go insait long haus na em i lukim susa bilong em.

Na susa bilong em i tokim em bilong wanem yu kam? Nogut ol i kilim yu wantaim. Na brata bilong em i tok mi hangre na mi kam! Orait susa bilong em i givim wanpela plet kaikai long brata bilong em.

Bihain em i kaikai pinis em i askim susa bilong em long wanem de tru ol bai kilim yu na ol bai kaikaim yu? Na susa bilong em i tok; "Ol bai kilim mi long Fonde."

Olsem na brata bilong em i lusim em na em i go sindaun long as bilong diwai na em i wokim wanpela taur. Em i wokim pinis na em go slip long kil bilong diwai. Tulait i kamap na dispela man ya i wok long traim, traim taur bilong em, olsem tasol na tudak i kam.

Na ol masalai i kirap mekim singsing. Ol i hangamapim buai long diwai olsem manki ya i flai olsem pisin na em i sindaun long diwai na em i wok long kaikai buai na em is pet i go daun long ol masalai.

Tulait i kam na dispela liklik manki i flai i go long diwai wantaim taur olsem na em i lukluk long wanem taim bai ol i kilim susa bilong em. Na bihain em i lukim ol i kisim spia na akis na naip i redi long katim nek bilong meri. Na wanpela masalai i karim dispela meri i kam na putim em long graun.

Ol i lusim rop long hap bilong em na ol i redi nau long katim nek bilong meri. Tasol brata bilong em i kirap winim taur na guria i kamap. Olsem na olgeta masalai i ran i go long bus. Brata bilong em i ran i kam na i holim em long han na tupela i ran i go bek long ples bilong tupela.

Anton Waino
Ramu River

PAINIM WOD PILAI

- | | | | |
|----------------------|----------------|----------------|---------------|
| Ol wod lista: | FOTIN | KUNAI | OLPELA |
| | GRILE | LOKAPIM | PALMAN |
| ANINIT | HAISIM | LULUAI | PINIS |
| BATERI | HETKELA | MALARIA | POPO |
| BLAKBOT | JOINIM | MASIN | RIGIN |
| DISTRIK | KAMBANG | MUKMUK | SEKAN |
| EPRIL | KIAU | NILPIS | SIOT |

Y U C I G W W O E E E A W E N G Y C L I A A P F N
M S R F D E A Z G D E O C F P U B S N S T S E I A
G C E R X F E L H C O E T S E V K A F M T O G A I
K C P J E M O Y B G H S E J E C M R L B R I A S G
T F P R A I F M A G H O A F D U Q E F W R P N M G
E C F S E M I J D M R G O N U O K R O E V O I U O
E T H L R R T E J N O T R G R S X J T P S P N K N
H F E P S T O I G H I D B I I L C A I N A O I M C
W M S I I S T A G L D L Y L L W B M N K C L T U S
F Q W R U E B R S T Z N P D M E L A O G D S M K N
M A N O E L P H M E F V R I A I A L N R I V N A H
H F A I I Q H N O P I N I S S X K A U O T K H E N
D G A H N N E E E O S I O T I F B R F L G U A K Z
N Q T T O T S S I S S V M R N M O I O P U N I P I
D B R S N I C H A R A S O I A F T A O E E A S M W
E V E N T I H E E E H E T K E L A A I L P I I J T
Y S Z S I F O Y N M E K F I T Q A E V A R N M B W
G E E O P M S N H P D A V A M S I O A E I F I D F
I E W Y Y T P Q B A Z N E U E T R C G O L G I T I
F C S N L C O N F R S S D L N N R O J G S Z C L E

Ansa bilong Wod Pilai isu 2186



Turkey – Erdogan bai go het long det penalti

PRESIDEN Recep Tayyip Erdogan bilong Turkey i tokaut long wanpela bikpela bung long Istanbul olsem em bai tok orait long det penalti o lo bilong kilim indai ol trabelman sapos palamen na ol pablik i sapatim.

Em i bin toktok long planti tausent sapota bilong em long bikpela siti bilong Turkey. Dispela bikpela bung i kamap bihain long sampela lain soldia i traim long tekova long gavman bilong Turkey long mun i go pinis, tasol ol i lus.

Presiden Erdogan i tok bai kantri i pinisim olgeta sapota bilong Fethullah Gulen, wanpela lida bilong ol husat i stap nau long Amerika. Gavman bilong Turkey i sutim tok long Gulen long dispela hevi i bin kamap long kantri. Tasol Gulen i tok em i no bin stap insait long dispela hevi.

Ol lida bilong ol relijis grup na tupela bilong ol tripela oposisen pati i bin stap tu long dispela bikpela bung long Istanbul. Gavman i no bin invaitim Kurdish pati long dispela bung.

Moa long 270 pipel i bin dai long taim ol soldia i traim long tekova long gavman long Julai 15. Gavman i bekim na kalabusim planti pipel tru. Gavman i kalabusim planti tausent sapota bilong Mista Gulen na rausim ol long wok.

Planti kantri i bin toktok strong long ol pasin gavman bilong Turkey i bin mekim. Yuropien Yunien (EU) we Turkey i bin aplai long joinim, i no laik ol memba kantri i gat lo bilong det penalti.

Mista Erdogan i tokim dispela bung, “Palamen bilong Turkey tasol bai tokaut long det penalti...Mi tok save pastaim, bai mi tok orait long disisen bilong palamen.

“Ol i tok i no gat det penalti long EU, tasol i gat long USA, na Japan na Saina, planti kantri long wol i gat dispela lo. Mipela i bin gat dispela lo inap 1984. Kantri i bilong ol pipel na sapos ol pipel i mekim dispela disisen mi ting ol politikal pati bai bihainim.”

Presiden Erdogan i mekim planti strongpela toktok egensim Mista Gulen na em i givim tok lukaut olsem bai ol i kisim taim.

Em i tok, “Julai 15 i soim ol pren olsem dispela kantri i sanap strong egensim husat lain i salensim mipela long politik, iekonomik na diplometik wok, tasol mipela i strong tu long militeri salens. Kantri bai i no inap pret na i no inap pundaun.

“Bai mipela i painim olgeta memba bilong dispela ogenaisesen na pinisim ol aninit long lo, tasol sapos mipela i mekim olsem tasol, bai kantri i no gat strongpela difens long pait egensim wankain vairas olsem.”

Dispela bikpela bung ol i kolim “Democracy and Martyr’s Rally” i pinisim tripela wik bung ol sapota bilong Presiden Erdogan i wok long mekim long nait long olgeta hap bilong kantri.

Praim Minista Binali Yildirim i tokim dispela bung olsem bai ol i kisim Mista Gulen i kam bek long Turkey na bai em i kisim mekim save long dispela hevi i bin kamap long kantri.

Man i go pas long ami bilong Turkey, Hulusi Akar, i tok bai ol dispela lain husat i traim rausim gavman i kisim bikpela mekim save tru. Em i tok tenkyu long ol sivilien manmeri long helpim na stopim dispela hevi.

Pren bipo

Dispela wok painim na mekim save gavman i kamapim nau long Turkey i pinisim planti pablik sevan long wok na rausim ol ovasis wokman. Ol i mekim senis tu insait long ami bilong kantri. Gavman i kalabusim samting olsem 18,000 pipel.

Gavman i tokim ol lokal brens bilong AK Pati long rausim ol sapota bilong Gulen. Mista Gulen i bin wanpela pren bilong Presiden Erdogan inap tripela yia go pinis we ol i bin kros na bruk i go kam. Turkey i tokaut olsem lain bilong Gulen em ol teroris.

Ol rebel long Syria brukim banis bilong gavman long Aleppo



Ol lain Syria i selebret long strit bilong Aleppo.

SAMPELA rebel grup long Syria i brukim banis bilong gavman long Aleppo na ol lain i wok long amamas na selebret. Aleppo em i wanpela impoten siti long noten hap bilong Syria. Tasol ol lain ami bilong gavman i tok dispela ripot i no tru. Ol i tok ol i raunim ol rebel i go bek long wanpela atileri bes.

Ol lain ektivis long UK i tok ol lain rebel i bin kamap na bungim ol lain bilong ol long ls Aleppo. Tasol ol i tok ol rebel i no inap long strongim rot bilong go i kam long dispela hap.

Rami Abdel Rahman, husat i go pas long Syrian Obsevtori for Human Raits long UK i tok i tru ol rebel i brukim banis bilong gavman tasol ol i

no inap strongim rot. Ol rebel i tok ol i go insait long wanpela atilei bes long siti tasol ol lain bilong Syria ami i tok ol i raunim ol rebel i go bek.

Long narapela ripot, ol lain Kurdish na Arab i kisim bek Manjibi, wanpela ki siti bilong Syria, long han bilong ol Islamik Stet. USA i wok long helpim ol Kurdish na Arab long dispela eria.

Bikpela progres

Fawaz Gerges, profesa bilong Midel ls Politik long London School of Economics i tokim BBC nius olsem ol rebel i kisim sampela hap.

Rebel kolisen ol i kolim Army of Conquest, i wok long kisim sampela hap in-

sait long las 48 aua. Nau ol i mas traim long holim ol dispela hap ol i kisim pinis.

Ami bilong Syria i bin pait egensim ol rebel na ol lain Rasia i wok long helpim long tromoi bom long balus. Long dispela wik, televisen long Rasia i soim piksa bilong ol pipel i wok long lusim Aleppo. Tasol sampela rebel grup i tok dispela em i trik bilong kisim Aleppo.

Aleppo i bin bikpela bisnis siti bilong Syria we i gat ol olupela bilding na ol samting bilong tumbuna i stap long en. Planti bilong ol dispela samting i bagarap o ol stilman i kisim nabaut long taim dispela woa i stap inap 5-pela yia nau.

Tait i kilim planti lain long Masedonia

SAMTING olsem 21 pipel i dai long taim tait wara i kamapim bikpela birua long Skopje, biksiti bilong Masedonia bihain long bikpela ren tru i pundaun.

Ol i painim bodi bilong ol dispela lain long Sande moning bihain long ren i pinis. Sampela bilong ol dispela lain i bin dai insait long kar bilong ol. Tait wara i bin brukim sampela hap bilong rot na karim ol kar i go lusim longwe. Ripot i tok 93mm ren i bin pundaun long sampela hap long Skopje na wara i kam antap inap long mak bilong 1.5 mita long sampela hap.

“Olgeta hap i bagarap. Ol TV na frisa na sia i drip antap long wara. Planti haus i bagarap, sampela i pundaun na i no gat ilektrik pawa.”

Gavman bilong Masedonia i tok i gat bikpela kraisis nau long Skopje na Tetovo.

Meya bilong Skopje, Kove Trajanovski, i tok, “Mipela i no bin lukim kain samting olsem.”

I bin gat laitning na klaut i pairap klostu klostu. Mipela i pret tru,” Biljana Joneska, 62 krismas, i tok long Skopje.

Ol nius ripot i tok ol embulens i mekim 65 ran long karim ol pipel i go long haus sik na moa long 20 pipel i bin go long haus sik. Gavman i bin singautim ami i go helpim ol

Graun i bin bruk i go daun na pasim rot i go long 3-pela ples long not-is hap bilong kantri. Ol i tok save tu long ol pipel long dring botol wara tasol long kukim kaikai na dring.



Ol Wes Papua refuji i painim graun long PNG

Sam Seke i raitim

WES Papua Rilif Asosiesen long Papua Niugini i wok long traim stretim ol hap graun long Pot Mosbi na long sampela hap bilong kantri we long ol Wes Papua refuji i ken stap gut long en.

Moa long 10 tausent pipel bilong Wes Papua husat i bin ranawe long hevi aninit long han bilong gavman bilong Indonesia klostu 50 yia nau, i stap olsem ol refuji long PNG.

I kam inap nau, sampela i stap yet long refuji kem long Kiunga long Westen Provins, na sampela i stap long ol setelmen long Madang, na tu long Vanimo long Sandaun Provins.

Kodineta bilong Wes Papua Kempen Sata long PNG, Fred Mambrassar i tok planti handet Wes Papua famili i stap tu long ol setelmen long Pot Mosbi.

Em i tok ol i wok long tok-tok wantaim ol papagraun

na gavman wantaim helpim bilong NCD gavana, Powes Parkop long kisim wanpela 10-hectare hap graun long Red Hill long Gerehu we ol i ken stap gut long en.

Mista Mambrassar i tok em bai gutpela tru long lukim ol tarangu husat i stap planti yia pinis long refuji kem long Kiunga long ol go stap gut long wanpela hap graun ol i ken lukim olsem em i bilong ol yet - wankain olsem ol lain long Madang na Vanimo.

Singirok i laik strongim nesanel sekyuriti bilong PNG

Caroline Tiriman

WANPELA komanda bipo bilong ami long Papua Niugini, Jerry Singirok i tokaut pinis olsem em i gat bikpela laik long strongim wok bilong ami long lukautim gut nesanel sekyuriti bilong kantri.

Mista Singirok bai sanap makim Pangu Pati na resis long 2017 nesanel ileksen na em bai resis long kamap Gavana bilong Madang provins.

Em i tok strong na wok bilong ami i bin pundaun tru, na tu, ol soldia i no gat gutpela displin o i no save mekim

gutpela wok long wanem ol i no amamas tumas long planti samting olsem pe bilong ol.

Mista Singirok i tok tu olsem narapela samting em kantri i mas strongim wok bilong ol polis na tu stopim ol kain pasin bilong yusim ol gan na sutim nating ol pipel.

PPC Moreari i tok ol ripot i no tru

Sam Seke i raitim

OL toktok i bin kamap olsem sampela kriminal lain wantaim gan i holimpas sampela pipel long wanpela bilding long Alotau long Milen Be Provins las wik Fonde, em i no tru.

Provinsal Polis Komanda bilong Milen Be, Joseph Moreari i tok, ol i wokim bikpela

sekyuriti operesen bihain long dispela tokwin i kamap.

PPC Moreari i tok ol polis i bihainim stret pasin bilong wok bikos ol i bin bilip em i wanpela "hostage" situesen, o we ol gan man i holim kalabusim ol manmeri.

Em i tok ol i painimaut bihain long 5-pela aua polis operesen olsem ol wokman bilong bilding

tasol i stap insait.

Ol pastaim ripot i tok tupela pipel i bin kisim bagarap long polis operesen, tasol PPC Moreari i tok i no gat wanpela man i bin kisim bagarap o i dai.

PPC Moreari i tok ol polis i gohet yet long investigesen bilong ol long painimaut gut wanem samting tru i bin kamap.

Ol Caterets pipel i gat nupela graun

Caroline Tiriman i raitim

LIDA meri bilong Caterets Atolls long Atonomas rijon bilong Bogenvil i tok amamas long Katolik Sios long givim nupela hap graun long bikples Bogenvil we sampela moa famili bilong Caterets bai ken go stap long en.

Ursula Rakoa, Eksekutiv Dairekta bilong Tulele Peisa,

wanpela grup i save helpim ol pipel bilong Caterets bihainim wari bilong Climate Change, i mekim dispela toktok bihain long Katolik Sios long Bogenvil i bin givim tok orait long mun i go pinis.

Ol pipel bilong Caterets i wok long bungim bikpela hevi nau long wanem, solwara i wok long bagarapim graun na ol gaden kaikai bi-

long ol pipel.

Samting olsem tenpela famili bilong Caterets i muv i go pinis long bikples Bogenvil na dispela nupela graun bai lukim 20 moa famili i kirap i go tu long Bogenvil.

Climate Change i wok long kamapim planti hevi long ol pipel nau long Pasifik rijon, wantaim PNG tu.

Skelim gut TCS divelopmen



Lihir gol main em i namba tri bikpela gol main long wol.

TAKIS Kredit Skim (TCS) bilong Lihir Gold Mine i wok long bringim planti gutpela sevis na divelopmen long Nu Ailan Provins tasol ol lida na pipel i mas luksave gut long wanem eria i wok long kisim sevis aninit long TCS.

Nu Ailan Gavana Sir Julius Chan i tok provins bilong em i wok long kisim ol sevis na diveopmen i kam aninit long TCS bilong Lihir Gold Mine na dispela program i wok long kirapim planti gutpela samting.

"Yumi nidim TCS long bringim divelopmen long provins bilong yumi tasol yumi mas lukluk gut long wanem ol prairiti eria bilong divelopmen i wok long kisim kontrak aninit long TCS," Sir Julius i tok.

Sir Julius i tok provinsal gavman i bin makim wanpela gutpela kontrakta long kirapim Burakalai Maus Rot i go long Tubuana Rot, tasol TCS i makim narapela kontrakta gen long laik bilong em yet.

Em i tok Nu Ailan Provinsal Gavman i laik kamapim wanpela sistem insait long provins we kontrak bilong mekim ol divelopmen wok i

mas go long ol bikpela kampani husat i gat ol masin na ol samting long pinisim gut kontrak wok.

"Dispela bai kamapim strongpela kompetisen long konstraksen wok na prais mani bilong kontrak i ken pundaun i kam daun."

Sir Julius, husat i bipo praim ministra, i tok maski TCS i wok long mekim planti gutpela divelopmen wok, i gat planti samting insait long provins we Newcrest Mining i mas mekim.

"Newcrest i mas lukluk gut long sampela moa wok long kirapim laik bilong manmeri husat i papagraun bilong Lihir," Sir Julius i tok.

Em i tok Newcrest i mas lukluk moa long ples we i mekim bisnis na mekim ol wok bilong kampani.

Sir Julius i autim dispela toktok bikos ol manmeri bilong Lihir i no gat gutpela rot na bris.

Kampani wantaim gavman i bin sainim wanpela agrimen 20 yia i go pinis long kirapim gutpela rot na bris tasol no gat wanpela rot o bris i kamap yet.

"Ol manmeri bilong Lihir i slip, kirap yet long haus sak-

sak. Kampani i no mekim wanpela gutpela samting long senisim laik bilong ol manmeri," Sir Julius i tok.

Sir Julius i tok ol manmeri long Lihir i nidim pawa na wara tasol Newcrest i no save givim dispela sevis long ol asples.

"Newcrest i no save sem bikos klostu long namba tri bikpela gol main long wol, ol manmeri i no gat gutpela wara saplai, pawa na senitesen.

"Dispela i luk olsem em i liklik samting long bikpela kampani olsem Newcrest. Mi laikim Newcrest long givim wara na pawa saplai long ol manmeri Lihir. Mi tokim ol pinis long sekim dispela asua na stretim tasol ol i no mekim dispela wok yet," Sir Julius i tok.

Sir Julius i tok toktok namel long kampani na provinsal gavman i wok long kamap gut na tupela i wok bung long planti gutpela wok long larim main i ran yet na long helpim ol manmeri.

Tasol i gat planti bikpela wok i stap long mekim na Newcrest i mas pinisim dispela wok long senisim laik bilong ol manmeri Lihir.

Sir Julius amamas long kwatali ripot

NU Ailan Gavana Sir Julius Chan i wanbel long kisim kwatali ripot bilong Newcrest Mining.

Ol senia eksekutiv bilong Newcrest Mining i bin kisim dispela ripot bilong Lihir Gold Mine i go long Nu Ailan Provinsal Eksekutiv Kaunsil (PEC).

Kantri Menesa bilong Newcrest Mining, Peter Aitsi, i bin givim dispela ripot i go long Sir Julius long Julai 26.

"Taim Newcrest Mining i bin tekova long Lihir Gold Mine, pasin bilong em long givim ol ripot biong maining i kam long mipela i bin gutpela tru na mi amamas long dispela kain pasin bilong kampani long wokbung wantaim provinsal gavman na pipel," Sir Julius i tok.

"Gavman bilong mi i amamas long wok bilong Newcrest Mining bikos pastaim kampani husat i bin opretim Lihir i no save givim dispela kain ripot i go long provinsal gavman," Sir Julius i tok.

Dispela kwatali ripot i tok-tok long ol projek Newcrest Mining i wokim aninit long Teks Kredit Skim (TCS) bilong Lihir Gold Mine.

TCS em i mani ol maining na petroleum kampani husat

i wok long PNG i save yusim long kirapim ol gutpela sevis long helpim ol komyuniti ol i stap long en.

Dispela mani em i takis mani na em i inap long go stret long Intenel Revenu Komisin (IRC) tasol ainit long TCS, IRC i save larim ol dispela kampani i yusim dispela takis mani long kirapim ol sevis olsem klarum, haus sik, rot na bris, pawa saplai, sip bris na arapela ol komyuniti pablik sevis long benefitim ol manmeri insait long dispela ples we kampani i oporet long en.

Sir Julius i tok dispela mani we Newcrest Mining i givim aninit long TCS em i pablik mani bikos gavman inap long kisim long IRC olsem takis mani.

"Mi laik tok klia olsem dispela mani em i pablik mani. Em i takis mani bilong gavman, em i no mani bilong kampani," Sir Julius i tok.

"Dispela em ol mani we kampani bai no inap peim IRC olsem inkam takis, tasol kampani bai yusim dispela mani long kipraim ol sevis long divelopim PNG na givim sevis long ol manmeri," Sir Julius i tok.



Sir Julius Chan.

"I gat wanpela as we mipela i laikim TCS mani i mas mekim gut wok na karim gutpela kaikai. Na dispela em long kisim bikpela atonomi," Sir Julius i tok.

Sir Julius i tok PEC bilong Nu Ailan i bin amamas na wanbel long lukim planti gutpela divelopmen i kamap aninit long TCS.

Mani bilong TCS i fandim planti hai skul, sekenderi skul na rot na bris. Nau ol i laik kirapim wara saplai na senitesen program aninit long TCS wok.

"Sampela taim mipela i no save wanbel long ol disisen bilong yusim mani long TCS. Mipela i laikim provins i mas gat bikpela pawa long mekim ol disisen bilong yusim TCS mani. Tasol mipela i wanbel long olgeta divelopmen na sevis i kamap long Nu Ailan aninit long TCS," Sir Julius i tok.

O'Neill laikim kampani long givim bek long kantri

PRAIM Minista Peter O'Neill i singaut strong long ol kampani husat i mekim bisnis long PNG long givim bek long kantri.

Mista O'Neill i tok ol kampani husat i mekim bisnis long PNG na mekim moa mani tasol ol i no save givim bek sampela samting long kantri.

Mista O'Neill i givim dispela strongpela salens toktok long las wik Fonde taim em i lonsim nupela bren bilong Oil Search Foundation (OSF) long Pot Mosbi.

Moa long 200 manmeri i bin kam long dispela bung. Menesing Dairekta bilong Oil Search Peter Botten, Siaman bilong Oil Search Ricahrd Lee na Sif Eksekutiv Opisa bilong Oil Search Foundation, Kymberly Kerpore, i bin kam stap long dispela bung.

Mista O'Neill i tok Oil Search nau i opim ai bilong ol arapela kampani long PNG i long ting ting gut long ol pipel na givim sampela samting i go bek gen long komyuniti.

"Oil Search i soim gutpela rot na mi amamas long dispela nius. Mi laik makim maus bilong pipel na gavman long to tenkyu long Oil Search bai givim K185 milien long sapotim ol

program bilong OSF," Mista O'Neill i tok.

Mista O'Neill i tok dispela pasin bilong givim i go bek gen long komyuniti na kantri i soim olsem Oil Search i pas wantaim PNG.

"Dispela mak bilong komitmen Oil Search i givim long PNG bai senisim laik bilong planti ol manmeri bilong yumi," Mista O'Neill i tok.

Mista O'Neill i tok em i amamas long lukim dispela gutpela patnasip i kirap namel long gavman na kampani.

"Mipela (gavman) i stap long helpim bisnis i gro na kamap bikpela. Mi laik askim sampela ol kampani tu long bihainim dispela pasin bilong Oil Search na kirapim gutpela sevis long PNG," Mista O'Neill i tok.

Em i tok dispela kain pasin bai strongim level bilong patnasip namel long kampani na gavman.

"Yumi mas luksave olsem taim gavman na kampani i wok wantaim, dispela kain wokbung i save bringim planti gutpela samting.

"Gavman na pipel bai kisim helpim long sevis na divelopmen ol bisnis haus i givim bek long kantri.

"Ol bisnis haus tu bai luksave na kamap gutpela kopret sitisen taim ol i mekim dispela kain ol gutpela wok long senisim laik bilong manmeri na kantri," Mista O'Neill i tok.

Oil Search bai givim K185 milien long OSF long givim ol helt na medikel sevis long ol ples we Oil Search i save wok.

Hela, Sauten Hailans na Galp Provins em ol provins we ples we OSF bai yusim dispela mani long kirapim helt, edukesen na meri divelopmen.

OSF i mekim planti gutpela wok long Tari Haus Sik. Mista Botten, em i siaman bilong OSF na Tari Haus Sik.



Peter O'Neill.

Oil Search bai stap long PNG longpela taim

BIKPELA oil na ges kampani bilong PNG, Oil Search Limited, bai stap long kantri longpela taim, Siaman Richard Lee i tok.

Mista Lee i tok sosel risponsibiliti bilong Oil Search em i prairiti bilong Oil Search bikos sastenebel divelopmen bilong PNG em i nambawan samting we Oil Search i laik promotim.

Mista Lee i mekim dispela toktok taim ol i lonsim nupela bren bilong Oil Search Foundation long las wik.

Mista Lee i tok moa long 85 pesen wok manmeri bilong Oil Search em ol manmeri PNG tasol na wok bilong ol i wok long mekim dispela kampani long mekim gut winmani na kamap wanpela strongpela oil na ges kampani.

"Oil Search i bikpela namba tu projek patna long PNG LNG Projek. Ol gutpela samting mipela i mekim long PNG bai kamap bikpela moa.

"Mipela i laik kamap bikpela na namba wan investa long PNG. Long wankain taim, Oil Search i gat bikpela ting ting long



Agogo Prodaksen Fasiliti long Sauten Hailans.

kamapim gutpela patnasip wantaim gavman na pipel bilong PNG," Mista Lee i tok.

Em i tok sastenebel divelopmen bilong PNG em i namba wan prairiti bilong kampani.

"Maski prais bilong oil i pundaun ikam daun long intanesenel oil maket, dispela i no pulim mipela i kam daun. Oil Search i givim K185 milien long Oil Search Foundation long givim ol helt, edukesen na arapela ol komyuniti wok long ol ples we mipela i gat bisnis," Mista Lee i tok.

Em i tok bod bilong Oil Search bai sapotim OSF bikos ol sevis OSF bai givim namba wan sevis long senisim laik bilong manmeri bilong dispela kantri.

Envairomen i bagarap long Goroka taun

Loutova Siapea i raitim

PLANIM, lukautim na kamapim ol diwai em i save kisim planti yia, tasol long katim i go daun em i save kisim samting olsem 5 o 10 minit tasol, maski diwai i kisim longpela taim long gro.

Dispela kain wok em i save kamap, long wanem, ol man i laikim olsem ol envairomen bilong ol gutpela ples i mas luk nais na ol pipel i ken amamas long lukluk long dispela ol samting.

Dispela pasin i kamap nau long Pis Pak (Peace Park) long Goroka taun, Isten Hailans.

Long wik i go pinis Goroka taun atoriti i givim oda long ol wokman long katim ol diwai we i save sanap namel long taun. Na taim ol man i stat long katim ol diwai i go daun, planti tok kros i bin kamap namel long planti ol pipel bilong Goroka. Na wanpela long ol em Peter Yano bilong Keiyagana hauslain long Okapa.

Yano i tok, em wantaim

famili bilong em i no amamas long atoriti i katim dispela ol diwai long Pis Pak.

“Mipela i no amamas, long wanem, ples we mipela i save i go na sindaun long kisim malolo em i no gat nau. Ol i bin kolim dispela ples pis pak. Na wanem mining bilong pis pak?”

“Mining bilong pis pak long tok pisin em bel isi pak. Nau mipela i no gat bel isi, olsem na atoriti mas senisim



Ol diwai we i save givim gutpela ples kol bilong malolo long pis pak long namel bilong Goroka taun long Isten Hailans em taun atoriti i katim i go daun na ples long dispela eria em no moa luk nais. Foto: Loutova Siapea

nem bilong dispela pak i go long bel hat na as nating pak, long wanem, dispela pis pak i no moa luk nais. Em i bagarap, na long wankain taim tu em i bagarapim bel bilong planti ol arapela lain olsem mipela long distrik na provins husat i save i go na sindaun aninit long dispela ol diwai long kisim malolo. Nau yet mipela lukim pis pak olsem ‘belhat’ na ‘pak i no gat bilas’, Yano i tok.

Komyuniti na bisnis wanbel long nupela bris



Ol kar i ran gud long nupela Ambogo bris.



Oil Pam bisnis bai kamap gut bikos Oro i gat nupela rot na bris.



Ol asples i amamas long opim nupela bris.



Edward Kiza i givim setifiket long wanpela meri husat i stap long trening long ples Uria.

KONSTRAKSEN wok bilong kirapim foapela nupela bris long Eroro, Girua, Ambogo na Kumusi long Oro Provins i pinis.

Dispela projek i kamap long K139 milien na i lukim ol pipel na bisnis long Oro Provins i amamas long yusim dispela nupela bris bihain long Saiklon Guba i bin bagarapim ples long yia 2007.

Gavman bilong Australia i bin fandim dispela projek na Dipatmen ov Woks i kari-maut ol konstraksen wok long putim dispela fopela nupela bris.

Dispela fopela bris i stap long namel long Kumusi na nambis bilong Oro.

Dispela nupela bris bai sevim ol manmeri husat i stap long Kokoda. Maski ples i ren o san, dispela nupela bris bai stap yet long givim sevis i go long pipel.

Ol manmeri long Oro Provins i save yusim rot na bris planti taim long go long taun, mekim bisnis, na mekim arapela wok.

Taim Saiklon Guba i bin bagarapim ol bris long hap, ol manmeri i bin kisim bikpela taim long go long skul, haus sik o go long skul.

Ol bisnis tu i bin lusim planti sans long mekim mani taim bris i bagarap long yia 2007 i kam inap nau.

Dispela fopela bris na rot i stap save sevim klostu long 97,000 manmeri. Dispela em i klostu long haf populesen bilong Oro Provins.

Oil pam bisnis long Oro Provins i save yusim dispela rot long mekim bisnis. Dispela nius kamaut olsem rot i kamap gut na bris i op gen, i amamasim ol bisnis haus husat i mekim bisnis long Oil Pam.

Taim dispela fopela bris na rot i save blok, em i save blokim planti gutpela samting. Ol kampani i save lusim planti mani na lokol ikonomi bilong Oro i save kisim taim.

Usino-Bundi bisnisan tok amamas long divelopa

James G. Kila i raitim

WANPELA bisnisan bilong Usino-Bundi distrik i givim bikpela tok amamas bilong em i go long nikel/kobalt main divelopa long Madang provins Ramu NiCo Menesmen (MCC) long bringim kamap planti kain ol nupela senis long distrik na provins.

Edward Kiza, husat i papa bilong Tamane Gest Haus long Madang taun i tok planti ol ruel pipel long Kurumbukari na Usino eria, husat pastaim long independens i save kisim taim tru nau i painim isi long kisim gagman sevis bikos Ramu NiCo i wokim rot na bris long sevim ol pipel.

Mista Kiza i tok olsem dispela divelopa i kamapim bikpela senis tru long sait long infrastraksa olsem rot na bris taim em i wokim nupela rot i go antap stret long Kurumbukari maunten na tu wokim bikpela bris i go hap-sait long bikpela Ramu riva. Dispela ol bikpela infrastraksa i no bin stap bipo na bihain long independens. Tasol taim divelopa Ramu NiCo i muv i go insait long distrik em i kamapim planti

kain senis na tu givim wok long planti ol lokal manmeri long Usino-Bundi distrik na tu long Raikos.

Mista Kiza i bin mekim dispela ol toktok long greduesin bilong 60 lain husat i pinisim trening long pigeri na poltri menesmen long Uria wod 19 long Usino lokal level gavman (LLG) long wik i go pinis.

Em i amamas tru long divelopa Ramu NiCo (MCC) long givim ol wokman bilong en long Komyuniti Afes Dipatmen long go na slip wantaim ol pipel na ranim trening long ples Uria. Foapela wokman i stap wantaim komyuniti na mekim tupela wik trening long rot long lukautim pik na kakaruk na rot long sevim mani long dispela kain bisnis long ples.

Mista Kiza i salensim ol pipel long Usino-Bundi distrik long yusim sans bilong divelopa Ramu NiCo (MCC) i stap long distrik na ol i mas traime go insait long ol liklik bisnis taim ol i yusim network na ol program bilong Ramu NiCo na stretim sindaun bilong ol long ples na rural komyuniti.

Em i givim tok amamas bilong em tu long Thomas Ekim

Wekmara long ogenaism dispela pigeri na poltri trening long Uria na bringim ol Ramu NiCo CA opisa long ranim trening.

Em i tok ol ruel pipel long Usino-Bundi i mas amamas na tok tenkyu olsem i gat divelopa olsem Ramu NiCo (MCC) i stap long distrik bilong ol na i gat taim long givim trening long human risos long distrik na bringim gutpela senis long laipstail na sindaun bilong ol manmeri na pikinini.

Mista Kiza i tok bihain long 40 yia level na tingting bilong planti lain long distrik long wokim bisnis i no strong yet, olsem na ol mas lainim planti samting long trening em divelopa i givim.

Em i tok em i gat bikpela bilip olsem Usino-Bundi distrik insait long narapela 10 na 20 yia bai lukim bikpela senis stret i kamap taim narapela mineral projek i kamap antap long Yandera. Tasol em i givim salens long ol manmeri long wok bung wantaim Ramu NiCo long lukim olsem moa gutpela divelopmen i ken kamap long helpim sosel na ekonomik divelopmen long distrik.

TPA na Hela sainim agrimen

TOURISM Promotion Authority (TPA) i wanbel long Hela Provinsal Gavman i sainim wanpela agrimen wantaim Opis bilong Turisim, Kalsa na Ats.

Sif Eksekutiv Opsa (CEO) bilong TPA, Jerry Angus, i amamas long Hela Provins i luksave long turis bilong olsem wanpela sastenebel bisnis long helpim ol manmeri i mekim liklik bisnis.

Mista Angus i tok ol wan wan provins na Distrik Developmen Atoriti (DDA) i mas luksave long bisnis bilong turisim olsem wanpela gutpela bisnis we i ken helpim ol manmeri long ples i mekim mani.

“Mi laik tok tenkyu long Hela Provinsal Gavman i luksave long bisnis bilong turisim. Dispela agrimen bai helpim ol manmeri bilong Hela long kisim sampela helpim

long TPA,” Mista Angus i tok.

Hela i kamap namba wan provins long sainim dispela kain agrimen long promotim turis bisnis na i gat ol gutpela samting bilong dispela.

“Dispela agrimen bai helpim ol manmeri Hela i kisim ol spesel trening long mekim turis bisnis. Ol bai gat sans long kisim ol edvais toktok long ranim turis bisnis.

“Mipela i laik kirapim ol provin-sal misyium na arapela ol samting bilong pulim moa turis i kam insait

long provins.

“TPA bai helpim ol manmeri long kamapim websait, mekim ol posta na ol pepa wok long promotim liklik turis bisnis bilong ol,” Mista Angus i tok.

Em i tok Hela i gat nem long turis bisnis long PNG bikos binem Huli wigman i save apim nem bilong PNG.

“Ambua Lodge em i wanpela biknem eko-turisim bisnis long PNG na long wol tu. Dispela i stap long Hela,” Mista Angus i tok.

Em i tok Hela i gat bikpela Komo ples balus we ol turis i ken yusim dispela ples balus long kam lukluk

raun long provins.

“Hevi bilong lo na oda em i wanpela bikpela asua long Hela. Mi laik tokim ol manmeri long Hela long stap isi na kisim dispela sans long mekim bisnis.

“Yumi mas lusim pasin bilong pait na kamapim trabel long ples. Yumi mas stap isi na mekim bisnis long senisim laip bilong yumi yet.

“Provinsal Gavman i sanim dispela agrimen long helpim ol manmeri, na ol manmeri long ples i mas yusim gut dispela sans long mekim bisnis. TPA i stap redi long helpim ol pipel bilong Hela,” Mista Angus i tok.

Wanpela man baim kar long NCSL seavings



NASFUND wokmeri long Wewak brens, Susan Tomdawa, i givim ki bilong nupela 16 Sita Bas ya i go long NCSL member Herman Huaffe long Wewak taim ol wanlain biong Mista Huaffe i lukluk i stap.

WANPELA memba bilong NCSL long Wewak, Is Sepik i baim wanpela kar long mani em i sevim wantaim NCSL.

Herman Huaffe em i wanpela lokal bisnis man husat i bin sevim mani bilong em wantaim NCSL long yia 2009.

NCSL em i NASFUND Contributors Savings & Loan Society Limited (NCSL). Em i wanpela liklik kampani bilong Nasfund.

Mista Huaffe i gat 45 yia krismas, na ples bilong em long Marik ples long Wewak. Mista Huaffe em em i save kamap draiva bilong ol maket manmeri husat i save karim ol kago i go i kam long maket long salim.

Mista Huaffe i lusim skul long yia 1986. Em i bin mekim gret 8 long Brandi Hai Skul long dispela taim tasol em i bin kisim bikpela sik na em i bin lusim skul.

Em i lusim skul na wok long Andersons Foodland supamakot long Lae.

Mani em i sevim wantaim NCSL i helpim em long baim tupela kar. Dispela tupela kar em bilong em nau.

Mista Huaffe i save yusim dispela kar long helpim ol maket manmeri long kisim ol samting bilong ol i go kam long maket.

Sampela yia bihain, em i lusim wok long Lae na i go bek long ples. Em i kamap fama na planim ol kaikai bilong em yet na salim ol kaikai long maket. Long yia 2007 Mista

Herman i bin statim wanpela liklik maket arere long haus bilong em wantaim K200. Insait long tupela yia tasol K200 ya mekim K2, 000 winmani.

“Wantaim K1, 100, mi baim wanpela bikpela dip frisa na 5 katen bia. Mi kirapim wanpela liklik taka sop arere long Sepik Haiwe na mi salim ol kaikai na bia,” Mista Huaffe i tok.

“Long yia 2011, mi kirapim wanpela pemenen tred stua. Mi yusim K12, 000 long kirapim dispela stua we nau mi ranim long Marik ples,” Mista Huaffe i tok.

“Mi mekim dispela liklik bisnis na mi skelim olsem mi mas sevim mani. Mi bin tingting long opim benk akaun wantaim ol komesal benk long sevim mani tasol mi bin painim hat long opim akaun wantaim ol.

“Mi harim olsem Nasfund na NCSL wok long helpim ol manmeri long opim akaun.

“Mi bin go long Wewak brens bilong Nasfund na NCSL, na ol wok lain long hap i bin helpim mi long opim nupela Eda Super akaun long dispela taim,” em i tok.

“Wanpela bikpela samting we i bin strongim tingting bilong mi long sevim mani wantaim NCSL em i bikos ol i no save sasim mani long seavings akaun bilong mi.

“Na tu ol i no save katim mani nating nating olsem olkomesal benk i save mekim,” Mista Huaffe i tok.

Long mun Julai, Mista Huaffe i yusim seavings bilong em wantaim NCSL na i baim wanpela nupela 16 sita bas long K105, 594.70 long Ela Motors long Wewak.

Mista Huaffe i bin sevim mani bilong em long NCSL aninit long Jeneral Seavings Akaun.

“Wantaim NCSL, Jeneral Seavings Akaun gutpela akaun bilong sevim mani bikos dispela akaun i no save sasim ekstra mani, sevis bilong em i hariap tru, i no olsem long benk we i gat longpela lain, na ol wok lain em ol gutpela manmeri husat i save putim ol kastoma na memba i go pas.”

“Mi bin kisim wanpela dinau mani long NCSL long baim namba wan kar bilong mi long yia 2012, na long dispela yia mi rausim mani long Jeneral Seavings Akaun bilong mi wantaim NCSL long baim namba tu kar bilong mi,” Mista Huaffe i tok.

Em i tok em i lukim ol gutpela samting bilong NCSL na em i laik salensim ol manmeri long yusim dispela sans long kamap memba bilong NCSL na Nasfund.

“Mi lukim ol gutpela samting bilong sevim mani wantaim NCSL. I gat planti gutpela samting i stap sapos yu sevim mani wantaim NCSL,” Mista Huaffe i tok.

NCSL i save tokim ol manmeri long sevim mani na kirapim gutpela laip na sindaun long komyuniti.

WHITE TUNA FLAKES
DIANA White

WHITE TUNA insait K 2.20

DIANA Barbecue Flavour

Tasty and Flavourful White Tuna for Everyone!

Manufactured by: RD Tuna Cannery Ltd.



Ramu NiCo strongim wok-bung long Projek eria bilong en

GIVIM gutpela save na tingting long ol pipel long wokim bisnis na wok hat long graun em wanpela bikpela tingting divelopa Ramu NiCo Menesmen (MCC) i laik bringim i go long ol pipel insait long wok eria bilong en long Usino-Bundi na Raikos distrik long Madang provins.

Vais Presiden bilong Ramu NiCo, Wang Baowen i tokaut long dispela long ples Uria long Usino LLG long Usino-Bundi distrik long Madang provins.

Mista Wang i bin lusim bikpela opis bilong em long Madang na ran long kar i go antap long Sumao maunten we i stap baksait long Kawawar maket long Uria wod 19 long lukim greduesen bilong 60 lain

manmeri husat i kisim trening long pigeri na kakaruk projek menesmen.

Mista Wang i tok trenferim laip-skills na save i go long ol komyuniti long Ramu NiCo projek eria em bikpela samting na Kampani laikim dispela i mas kamap long Kurumbukari, Inlen Paiplain (Maigari), Kostal Paiplain na Basamuk eria long Madang.

Em i tokaut olsem Kampani i gat bilip olsem wanem ol trening em ol Ramu NiCo Komyuniti Afes opisa i givim bai kamapim veliu long wok bilong gavman long sait long daunim hevi bilong stap gut, kamapim wok, fud sekyuriti, wok bung wantaim ol meri na bringim kamap mani na bisnis insait long ol rurel komyuniti long PNG.

Mista Wang i tokaut tu olsem sapos yumi laik lukim ol pipel bilong yumi stap smat, helti na gat gutpela save em i moa gutpela olsem wok bilong pablik-praivet patnasip i mas stap.

Ramu NiCo i amamas long wok patnasip insait long pablik-praivet wok-bung taim em i bin sainim wanpela memorandum ov agrimen (MoA) wantaim Dipatmen ov Egrikalsa na Laipstok (DAL) na PNG Kakao Kokonas Institut long Tugiak viles klostu long Basamuk long 2013.

Mista Wang i tok PNG gavman yet bai i no inap long givim ol sevis i go long olgeta lain long rurel ples long PNG. Em i nidim tim sapat long pablik na praivet sekta oge-naisesen long kamapim senis long

laip bilong ol manmeri na pikinini long rurel ples long kantri.

Mista Wang i givim bikpela tok amamas long ol lain fama husat i greduet long trening long lukautim pik na kakaruk na menesim olsem bisnis long ples.

"Plis yupela mas yusim save yupela i kisim long mekim wok long ples na helpim sindaun bilong famili, ples na komyuniti bilong yupela," em i tokim ol.

Em i tokim ol komyuniti tu long wok klostu wantaim ol gavman egrikalsa lain ejensi long Madang.

"Dispela em bikpela samting bikos wantaim liklik risoses yumi gat, yumi ken serim wantaim na karimaut ol wok long helpim ol pipel bilong yumi long lukim gutpela sosel

na iekonomik developmen,"

Em i givim salens long Wekmar Poltri Projek long Inlen Paiplain long gohet long gutpela wok ol i wokim na wok bung wantaim DAL na Ramu NiCo long kamapim gutpela senis insait long komyuniti ol i stap long en.

"Taim yumi holim han na wok bung wantaim bai yumi ken kamapim senis insait long komyuniti bilong yumi," Mista Wang i tok.

Em i tok olsem insait long het-tok bilong Kampani em "Wanpela Ramu NiCo, Wanpela Komyuniti" planti moa gutpela senis i ken kamap long stretim sindaun na laipstail bilong ol pipel tude, tumora na bihain long wok maining i pinis.



Naispela tumbuna welkam singsing long ples Uria long Begesin.




Ol lain givim narakain stail welkam long Ramu NiCo lain.



VP Wang Baowen givim setifiket long wanpela treini long Uria.



Treini meri givim tok amamas na tenkyu long Ramu NiCo.





Opening Seremoni.

Ledecky klostu i brukim wol rekot bilong em yet



Ledecky i pilim orait bihain long em i winim mak long gutpela taim.

Jennings na Ross i kamap wina long nambis volibal



Walsh Jennings (l) na Ross i stat win long Rio wantaim gol medal.

OLIMPIK Sempion, Kerri Walsh Jennings, na nupela poro pilaia bilong em, April Ross, i winim gol medal long namba wan nambis volibal resis i bin kamap long nait long Rio 2016.

Tupela i daunim Mariafe Artacho del solar na Nicole Laird bilong Australia long tupela set, 21-14, 21-13, long pul C preliminari resis long Copacabana nambis long las wik Sarere nait.

Walsh Jennings na tim poro bilong em, Misty May-Treanor, i kamap gol medal wina long nambis volibal long 2004, 2008 na 2012 Gems.

Long London, April Ross i bin sanap long narapela sait bilong net winim silva medal. Long Rio, wantaim nupela poro bilong em, Walsh Jennings, em i pilai gut tru.

KATIE Ledecky i bin setim Olimpik rekot na klostu i brukim wol rekot bilong em yet long preliminari resis long 400 mita fristail long Sande, Ogas 7.

Em i setim dispela rekot long Rio 2016 Olimpik Gems na winim namba wan gol medal bilong em.

Ledecky i gat 19 krimas bilong Amerika, i bin winim gol long 800 mita fristail long London 2012, i bin winim mak insait long 3 minit na 58.71 seken. Em i bin abrusim taim, 3 minit na 58.37 seken, we em i bin setim wol rekot long 2014.

I no gat wanpela i resis klostu long em na em inap long resis long fainel. Jazz Carlin bilong Briten em i kwik kwalifaia tasol em i kam 4-pela seken bihain long em.

Brasil i amamas long Rio 2016 resis opening

OLIMPIK Gems resis bilong 2016 em ol i bin op long Ogas 5, na Rio de Janeiro, siti husat i go pas long dispela resis i welkamim olgeta kantri husat i go long resis insait long tupela wik.

Ol i bin opim 2016 Olimpik resis long Iconic Maracana Stediam long Brasil.

"Dispela em i namba wan taim we Olimpik Gems i kamap long Saut Amerika na em i stat long Brasil na bai inapim olgeta hap bilong Saut Amerika," Presiden bilong Intenesenel Olimpik Komiti

(IOC), Thomas Bach, i tok.

Long taim bilong opim resis, olgeta kantri i bin kam wantaim kaikain kala bilong danis long soim wan wan kalsa na pasin bilong ol.

Gris em i namba wan kantri husat i bin go antap long stej wantaim stail danis bilong em bihain long ol asples, Brasil, i soim stail bilong ol. Plak keria bilong Gris, Sofia Bekatorou, em i namba wan meri long karim plak bilong kantri.

Rifuji Olimpik Tim i kam wantaim 10-pela tim bihain

long ol Gris. Ol manmeri i singaut taim ol Rifuji Olimpik Tim i kam kamap na dispela em i namba wan taim bilong histori bilong Gem we ol Rifuji Olimpik Tim i kam long resis wantaim.

"Long spirit bilong Olimpik Gems resis wantaim bikpela rispek, mipela i welkamim Rifuji Olimpik Tim," Bach i tok.

Na ol narapela tim i kam kamap wankain tasol long bihain na ol i bin singim Olimpik Entem bipo long pinis bilong Seremoni.

Kelmendi i winim gol long judo



MAJLINDA Kelmendi i winim namba wan gol medal bilong Kosovo long 52 kilogram judo resis.

Kosovo i kisim indipenden long Serbia long 8-pela yia i go na Intenesenel Olimpik Komiti (IOC) i luksave long em olsem wanpela indipenden kantri long tupela yia i go.

Tupela taim wol sempion, Kelemendi, i resis long 52 kilogram judo resis bilong ol meri olsem wanpela top pilaia long divison.

Em i bin resis long 2012 Olimpik Gems olsem memba bilong Albania bikos IOC i no luksave long kosovo yet.

Kelmendi i kamap plak keria bilong ol 8-pela etlit bilong kantri bilong em na dispela i soim olsem em i ken winim namba wan gol bilong kantri bilong em.

Kelmendi i tok bipo long Olimpik resis olsem em i lukluk long bringim amamas i go long ol manmeri bilong kantri bilong em.

Majlinda Kelmendi i wanbel long pilai graun bihain long em i kisim gol medal long IOC Presiden, Thomas Bach.

Rio 2016 Swiming: Tupela susa i amamasim Australia wantaim gol



Ol Australia gol medal wina bilong 4x100 fristail riley resis, Emma McKeon, Brittany Elmslie, Bronte Campbell na Cate Campbell sanap long Olimpik Akwatik Stediam.

TUPELA susa long Australia i soim kala bilong ol long swiming na daunim ol namba wan swima bilong Amerika.

Cate na Bronte Campbell i amamasim Australia taim tupela i winim gol na winim wol rekot tu.

Tupela susa i go pas long skwat bilong ol na i winim 4x100 mita fristail riley long Rio 2016. Liklik susa, Bronte, i abrusim Dana Vollmer, husat i go pas long namba tri lek na bikpela susa, Cate, i go het long fainel na namba foa lek egensim Katie Ledecky bilong Amerika na winim mak insait long 3 minit na 30.65 seken.

Ol Australia i brukim rekot bilong ol yet, 3

minit na 30.98 seken, we ol i bin setim long tupela yia i go.

Na tu, ol i bin brukim sampela wol rekot long swiming tu long wankain nait we Katinka Hosszu bilong Hungary i brukim wol rekkot bilong 400 mita wan wan medli resis bilong ol meri na dispela em i namba wan gol medal bilong em long Olimpik resis.

Bipo long dispela resis i kamap, Adam Peaty bilong Great Briten i brukim wol rekot bilong em yet long 100 mita brekstrook resis.

I gat planti wankain risal i kamap long dispela de resis we ol i bin brukim planti ol wol rekot.

PNG Karate i lukluk long Tokyo resis

BIHAIN long nius bilong ol i skruim wantaim ol narapela 4-pela spot long Olimpik resis i kam, Papua Niugini Karate Federesen (PNGKF) i lukluk long salim namba wan Olimpik karate pilaia bilong em i go long Tokyo Gems long 2020.

Presiden bilong PNGKF, Carl Mari, i tok, em i gat bikpela amamas long harim nius olsem Intanesenel Olimpik Komiti (IOC) i tok orait long karate resis bai kamap long Tokyo 2020.

“Dispela histori bai go insait long Olimpik Program na ol karate pilaia bilong mipela long nau na bihain long PNG na olgeta hap long wol bai makim dispela resis,” Mari i tok.

Wol Karate Federesen (WKF) i bin bid long skruim karate resis long 2012 Gems long London na 2016 resis long Rio i no bin kamap gut, tasol nau bid bilong WKF i

winim mak long Karate resis bai kamap long Tokyo 2020. Namba wan bid bilong resling resis i ken kamap long 2020 long Tokyo, Japan, em ol i no bin kamap. Tasol, karate na ol narapela 4-pela spot em ol i bin winim mak long bid na gutpela nius i bin kam aut long Trinde, Ogas 3 long dispela yia.

“WKF na globol karate famili i lukluk long soim namba wan resis long 2020 na tu long 2024,” Mari i tok. Em i tok, dispela rot em i longpela na hat tru, tasol em bai kamap orait aninit long kwalifikesen bilong Tokyo 2020.

Taim wan wan kantri bai i gat wan wan mak bilong ol long bungim dispela resis, PNGKF i stat pinis wantaim ol PNG skwat bilong nau husat i mekim wok redi bilong resis long Osenia Karate Sempionsip long

Noumea, Nu Kaledonia, long Septembi 15 i go inap 16 bilong dispela yia.

Wok redi na kwalifikesen resis bilong ol long resis long Olimpik bai stat wantaim Osenia Sempionsip long dispela yia na ol narapela resis bai kamap long bihain i go inap long 2020.

“Dispela rot i gat bikpela salens i stap, tasol em i isi na mipela i lukluk long dispela, na ol etlit tu i redi gut i stap,” Mari i tok.

Em i tok tenkyu long ol eksekutiv bilong WKF long ol i bin go pas na driman bilong ol i karim kaikai.

Mari i tok tenkyu tu long Presiden bilong Osenia Nesenel Olimpik Komiti (ONOC), Dokta Robin Mitchell, Presiden bilong PNG Olimpik Komiti (PNGOC), Sir John Dawanincura, na Seketeri Jenerel bilong PNGOC, Auvita Rapilla, long sapot bilong ol.



OLIMPIK DRIMAN: Ol Karate Etlit i soim sapot bilong ol long spot bilong ol i ken kamap olsem Olimpik spot. Driman bilong ol i karim kaikai nau. Poto: Andrew Molen/PNGOC

TIM PNG i go insait long Rio

GEMS Viles bilong Rio 2016 Olimpik resis i welkamim Tim PNG long 8 klok apinun (PNG taim). Meya bilong Gems Viles i gat sans long welkamim ol wan wan kantri na givim taim long ol long resisim plak bilong ol.

Meya bilong Rio 2016 Viles, Janeth Arcain, em i namba wan basket bal pilaia bilong Brasil na gol medal wina bilong Olimpik Gems i welkamim Tim PNG wantaim ol narapela tim, Iceland, Luxembourg, Oman, Sierra Leone na

South Sudan long welkam seremoni bilong Viles.

Tim PNG i amamas long Joinim welkam seremoni na Vais Minista bilong Spot, Labi Amaiu, tu i stap wantaim ol long welkam seremoni.

Sef de Misin bilong Tim PNG, Emma Waiwai, i makim tim na givim wanpela presen i go long Meya bihain long ol i reisim plak bilong PNG na singim Nesenel Entem.

Dispela presen em i wanpela kaving i gat sain bilong

Tim PNG logo we ol i bin mekim long PNG.

Etlit bilong Tim PNG, Toea Wisil, wantaim kosa bilong em, Alison Fairweather, i bin go kamap long Rio bipo long welkam seremoni. Ryan Pini, Raymond Ovinou, na etlit bilong Taekwondo, Samantha Kassman na Maxemillion Kassman, i bin stap tu long welkam seremoni.

Ryan Pini i bin karim plak bilong Tim PNG long taim bilong opening seremoni bilong Rio 2016.



Ol i welkamim Tim PNG long Gems Viles.

IOC i tok orait long 5-pela nupela gem long Olimpik resis

INTANESENEL Olimpik Komiti i tok orait long skruim 5-pela spot, besbal/softbal, karate, sketbod, spot klaiming na sefing, long spot program bilong

Olimpik Gems bai kamap long Tokyo, Japan, long 2020.

Dispela em ol bai lukluk long nupela disiplin bilong ol long skruim 18 spot long

Olimpik program, na 474 etlit long resis.

Ol bai kisim wankain namba bilong man na meri etlit wantaim long bungim dispela namba, tasol long besbal em ol man bai kamapim tim na long softbal em ol meri bai kamapim tim.

Wan wan besbal tim bilong ol man bai i gat 24 pilaia na softbal tim bilong ol meri bai i gat 15 pilaia.

Ol i strong tru long skruim karate long Olimpik program na Wol Karate Federesen i amamas na welkamim dispela taim bikos em bai go insait long histori bilong Olimpik program.

Papua Niugini Karate Federesen i amamas tu long dispela nius bikos dispela bai redim sans bilong ol etlit long kantri bilong go insait long Olimpik Gems resis bai kamap long 2020.



MAKIM TOP: Papua Niugini Karate etlit, Cosmas Saliawali, i prektis long ol teknik bilong em long taim bilong trening. Poto: Andrew Molen/PNGOC

Rapilla i kamap memba bilong IOC

PAPUA Niugini spot i winim wanpela mak we ol i bin makim Seketeri Jenerel bilong Papua Niugini Olimpik Komiti, Auvita Rapilla, olsem memba bilong Intenesenel Olimpik Komiti (IOC).

Em i wanpela bilong 8-pela nupela memba ol i bin makim long namba 129 IOC sesen i bin kamap long Ogas 4.

IOC i tok ol i bin makim nupela IOC memba aninit long ol i save gut long spot, kalsa, medisn, sosioloji, bisnis, lo na menesmen. Ol i bin makim 4-pela man na 4-pela meri kamap memba bilong IOC.

Ol memba bilong IOC i save makim laik bilong IOC na Olimpik Muvmen long wan wan kantri bilong ol na ogenaisesen bilong Olimpik Muvmen we ol i save wok long en. Ol i gat pawa long vot long ol namba wan disisen bilong Olimpik long makim wanem siti i win long go pas long Olimpik resis na ol wanem

spot bai go insait long Olimpik Program.

Rapilla i tok, ol i bin makim em long kamap namba 115 memba bilong IOC i soim hat wok bilong Papua Niugini Olimpik Komiti na ol memba, stekholda na patna bilong PNGOC.

“Mi gat bikpela amamas long sapot bilong ol lain husat i pilai spot long PNG na Osenia bikos ol dispela lain i strongim mi long kisim dispela wok,” Rapillai tok.

Ol i makim Rapilla em i namba wan taim bilong PNG long kamap memba bilong IOC inap long taim ol i bin kisim Olimpik stetus long 1974.

Rapilla i gat Mastas long Spot Ogenaisesen Ogenaisesen Menesmen na Digri long Pablik Edministresen.

Presiden bilong PNGOC, Sir John Dawanincura, i tok, Rapilla i kisim ol dispela wok bikos em i soim komitmen bilong em long wok.



NUPELA MEMBA BILONG IOC: Rapilla i sanap neks long presiden bilong IOC, Thomas Bach, na ol narapela memba bilong IOC.



RAN AWE TRAI: Lukim poto bilong Ase Boas i kisim lus bal long trai lain bilong ol na ran go long trai lain bilong Bears na skoa. Ol poto Nicky Bernard



TRAI YA: Sailas Gahuna i amamas wantaim ol sapota bihain long em putim trai long pilai wantaim Bears long NFS. Hunters i win 30-20.



SAIT STEP: Thompson Tete i traim sait step long pilai bilong Bears.



BAI YU GO WE: Winga bilong Bears i traim banis bilong Tete na Boas. Bears i lus long Hunter na bringim kam daun long namba tu ples long lata.



TENKYU LONG KAM: Ol famili bilong tupela brata husat i save pilai wantaim ol Ipswich Jet i sanap wantaim Richie Pandia. Richie na Sebastian Pandia i kam wantaim tim bilong tupela Jets na pilai wantaim Hunters tupela wik i go pinis.




SALIM BAL KAM: Beta bilong DHL i redi long paitim bal taim ol kisim Trukai long slow pits resis bilong sofbal long Bisini sofbal graun.



EM ISI YA: Pitsa bilong Trukai i tromoi bal long pilai bilong ol wantaim DHL long slow pits sofbal kompetisen long Bisini.





WHITE TUNA FLAKES
DIANA White



Manufactured by:
RD Tuna Cannery Ltd.

WHITE TUNA
insait
K 2.20



Tasty and Flavourful White Tuna for Everyone!

Hill em i CEO bilong RLWC 2017

OL i makim ekspiens Ragbi Lig edministreta, Andrew Hill, i stap long piksa long kamap Sif Eksekutiv Opisa (CEO) bilong Ragbi Lig Wol Kap 2017 (RLWC2017) Ogenaising Komiti.

Siaman bilong RLWC 2017, Dokta George Peponis, i tokaut asde olsem ol i makim Hill bihain long bipo CEO, Michael Brown, i risain.

"Mipela i amamas long Andrew i tok orait long mekim wok bilong CEO bilong Ragbi Lig Wol Kap 2017," Peponis i tok.

"Andrew i gat bikpela koneksen



Andrew Hill.

wantaim gem stat long grasrut i go inap long intenesenel level. Em i bringim teknikel save bilong em wantaim i kam long soim rot long ol gem long olgeta hap bilong wol.

"Ekspiens wok bilong Andrew long level bilong klap olsem senia eksekutiv bilong NRL na intenesenel federesen i bringim narapela kain kala long gem. Em bai mekim wok gut long go pas long Ragbi Wol Kap na bungim mak bilong ol lain husat i wok aninit long ogenaising komiti pinis."

Peponis i tok, "Mi laik tok tenkyu long Maria Sykes i sanap olsem ekting CEO taim bod i mekim las disisen long posisen bilong Andrew na mi gat bikpela amamas we Sykes bai go het na wok olsem Sif Opereting Opisa (COO)."

Hill i wanbel long lusim wok bilong em olsem Jenerel Menesa Lig Intagresen na Gem Developmen long Nesenel Ragbi Lig (NRL) resis.

"Ragbi Lig i kamap orait long kantri na long olgeta hap bilong wol we planti lain i pilai. Olgeta lain bai luksave long Ragbi Lig long ol yia i kam na mi lukim olsem Ragbi Lig Wol Kap long 2017 em i namba wan sain bilong winim dispela mak," Hill i tok.

"Mi gat bikpela amamas long stap insat long dispela resis na kamapim strongpela faundesen bilong dispela ples.

"Mipela bai soim resis bai kamap

long yia i kam long planti sapota we bipo i no bin kamap olsem, nogat. Mipela bai go pas long bikpela Ragbi Lig Wol Kap resis we em bai amamasim ol komyuniti na

kamapim wanpela strongpela poroman namel long ol pipel na spot.

Andrew Hill bai statim wok bilong em wantaim RLWC2017 long Ogas 29, 2016.



Samantha na Max Kassman i trening asde long resis long Taekwondo long Rio 2016 Olimpik Gems.




PMV

DIESEL OIL

PMV OIL BILONG YUMI



BOROKO MOTORS	
PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
Website: www.borokomotors.com.pg